


MUDIMU MWOWELA BYANZA

MUMANYISHIIBWE WÀ NZAMBI

 Twasàkidila, wa manza tètè, mwanèètù. Billy mmuswè bwà ngámbe ne ewu mmusangu wànyì wà kumpàla mu cyambilu, kacya kùkaadi ngondo yìsàtù. Nènku yéyè. . . Ndi mvùluka musangu wà kumpàla wùngàakamujuulà, bwà kufilayè bujaadiki, kwambayè ne: “Cintu cyà kumpàla, ndi ne bwòwà.” Nànsha mémè pànyì, ndi ne bwòwà. Bidimu bitwè ku makùmi àsàtù ne bitaanu mu mudimu wà bwambi, ne eci ki cikondo citámbe bule cìndiku mushiye cyambilu bwà kacya ngábwela mu mudimu wà bwambi. Bivwa binkèngela ndambù wa diikisha, ki ne mémè ne Mwanèètù Mosley, ne bamwè bàà ku bàna bèètù bàà balùme kaaba aka, tuvwa bayè mu kaalwendu kakesè kàa bulembi. Kàdi tudi biikishekù mpindyewu. Ne edi ndisangisha dyànyì dyà kumpàla kacya ànu mémè. . . bu ku ditùkù dyà kumpàla dyà ngondo wa citèèmà nàнку awu. Nènku ncintu. . . mudimu wà bwambi ncintu cidi cikèngela wèwè kushààla naaci.

² Nènku ngábàlòmbu bwà bìmanyikèku dikàpàkapà dyàdya, anyì kumòna ní mbafwànyineku kudiìmanyika, bwalu ndi mumanyè ne mbikolè bwà kuumvwa. Ne mbikolè, ndi mumanyè, pàdi muntu ùfila bujaadiki bwèndè. Bivwa binkolèle bwà mémè kuumvwa’s. Nudikù mwà kuumvwa bìmpè bwà mpindyewu anyì? Bìmpè. Ndi mumanyè ne bikèngela ngimanyina pabwipi ne cikòkokolo eci too ne pàlongololàbo cyàcya nàka.

³ Ncyà bushùwà ne edi ndyèsè di—dinènè bwànyì mémè, ne ndi—ndi bulelèlè ne kusàkidila kùdi mulombodi wa cibìlù, ne kùdi dyàpà dyà Beena Kantu—ku—byanza bàà Èvànjeeliyò mu Kaabujimà bàà mùneemu mu Yuma, ne bwà bambi bònsò. Bimbi balenga bàà misambu aba, bàvwà babànde kaaba aka ànu mu katanci kakesè aka abu, ndi njinga kubàtèelejakù ku—ku disangisha. Bivwa bìmpè byà kacya. Mvwa—mvwa ànu ndikonka, pàvwàbò bimba apu, Yone ní ùvwakù mummòne. Kàdi ndi ntèkemena ne ùvwa mummòne. Ne, pa nàнку, ndi ngumvwa ne nudi mu ditàbuluja kaaba aka. Mukalenge àtambè kunùbènesha, mwanèètù wa balùmè ne mwanèètù wa bakàji, panùdi nuyiisha apu. Ne kùdi balundà bàànyì bònsò bàà mu Phoenix ne mu myaba mishìlèshìlàngàne, mbwena kwamba ne. . . ne bàà mu Californie mwàmwa.

⁴ Nènku ndi muswè kwambakù ànu mwakù kampànda bwà mápà aa. Pàngàakàfikà kùdi beena Mpenta, mvwa. . . ngàkenza dilabula dyà mpenta, ncìyikù mumanyè ne kùvwa èkèleeziyà pèndè ne ngwa beena Mpenta to. Mvwa Baptiste Missionnaire

ciinè cikondo aci. Mvwa mupete dibàtiiza dyà Nyumà Mwímpè, ki mémè kujandula ne kùvwa bàmwè bantu bàvwa biitàbùùje cintu cìmwècìmwè cìmvwà mupetè aci. Kàdi bôbò bàkaavwa bacipetè bidimu makùmi ànaayi kumpàla kwà mémè kucipeta. Pa nàнку mvwa ànu, mwàkambà Pòlò, ngeela meeji, nciyi nteeta bwà kumutentula to, kàdi mu mùshindù kampànda “muntu mulela cikondo cimanè kupìta.” Kàdi. . . Bânà bèètù bàvwa bôbò bàmwèka bu bàvwa bèèla meeji ne mvwa mupàmbùke, bu mulalùka ànu menemene, mutùyakwamb’amu’s. Kàdi mvwa—mvwa mumanyè ne mvwa mupetè cintu kampànda. Dìbà adi, dilabula dyànyì divwa menemene ànu mwàkadìpetàbo kwàka amu. Nènku ki mùshindù awu wùndi mémè munangè cyôci aci.

⁵ Nènku, kàdi pângààkalwà munkaci mwàbò, ci—cìtùpà cìvwa cìpandà mwoyi pa bwalu abu ncyà ne, ngàkasangana ne bàvwa batàpùlùke, mu màngumba mashiilèshiilàngàne, ànu mùvwà èkèleeziyà wanyì wa ba-Baptistes amu. Nènku bôbò. . . Pàanyi’s mvwa ndyàmbidila ne kùvwa ànu umwèpelè wa ùbiikidiibwa ne m’Mpenta, kwàjiki. Kàdi, mémè kulwa kujandula ne, kùvwa màngumba àbò bùngi cyanààna mashiilèshiilàngàne. Pa nàнку, mémè. . . ònsò awu àvwa ànu mimpè. Ndi mumanyèku bàmwè bàà ku bantu bàà batàmbe bwímpè bànkààdiku pàanyi mutwilàngàne naabò, kacya bàndela, bàvwa mu biinè bisumbù ebi. Ne bàvwa—bàvwa, mu bushùwà bwà bwalu, màngumba mashiilèshiilàngàne. Kàdi àanyi—àanyi meeji ôwò àvwa ne bìvwa bikèngela twètù kwikala umwe mu mwoyi, biikàle ne Kilistò, nènku ncyàkashàalakù wa mu dingumba kampànda dyà ku wòwò awu nànsha. Mémè kushàala ànu pankaci pàabò, ne nditácisha bwà kukwàta byanza byònsò bibìdì, ne byanza byònsò, ne kwamba ne: “Tudi bânà bàà muntu.” Katwèna. . . Tudi bafwànyine kumòna tuntu tukesè bishiilàngana, muntu ne mukwèndè. Kàdi, pa kuumusha ànu biinè byònsò abi, s’tudi ànu bânà bàà muntu, bwalu tudi balediibwe ku Nyumà umwèùmwe awu. Tudi dîkù dyà Nzambì.

⁶ Pashiishe pàdi beena Kilistò bàà kantu-ku-byanza, Beena Kantu-ku-byanza bàà Èvànjeeliyò mu Kaabujimà abu, dyàpà edi, mvwa munkaci mwà masangisha àà kumpàla ne Mwanèètù Shakarian. Mvwa mumumanyè kumpàla kwà kwikalakù bulongolodi abu, anyì kwà ndongolwelu awu kutèekiibwayè. Mvwa ndyàmbidila ne cìvwa ncintu cinène. Ne ncilwè ciibi cyunzulula bwànyì mémè, bwà kwenza ngendu mu buloba bujimà ne Beena Kantu-ku-byanza bàà Èvànjeeliyò mu Kaabujimà aba.

⁷ Mwinè amu, misangu mikwàbò, nudi nusangana kasumbù kàà bambi, mîngà misangu, biikàle ne njiyà kampànda mikesè mibi bwà kasumbù kakwàbò, bwalu muntu kampànda mmwambè cintu kampànda. Aci kí mmyaba yònsò to, kàdi tudi tucisangana mu yimwè myaba. Nènku cileejiilu, èkèleeziyà kampànda yèyè mucitùùdile mfrangà, mukwàbò awu yèyè

kààkwikala ne cyà dyenzàmu to.

⁸ Kàdi ne Beena Kantu-ku-byanza bàà Èvànjeeliyò mu Kaabujimà, ncilwè ciibi cyunzulula bwànyì mèmè. Pàdìbo bàbwela, díbà adi mèmè ndi nkúngwija bàna bèètù bònso pàmwè, nènku tudikù—tudikù mwà kuswikakana; pàmwàpa bampaasàtà bàbìdì bafwànyìne kwikala ne njiyà kampànda, anyì cintu kampànda. Eci ncilwè ciibi cyunzulula cinènè, ne ndi mwenzè ngendu yà buloba bujimà bwàbò bóbò kùkaadi bidimu mpidyewu, ngenda ngààkula mu mápà àbò.

⁹ Nènku mèmè... Yuma kî ncinenga cinène menemene to, nànsha mündì ndicinkila ne ncinène menemene kutàmba cìndì mufumìne aci, Jeffersonville, mu Indiana. Kàdi ndi mutwilàngàne ne mulombodi wenù muneemu. Kùdì...yèyè ùvwa...ne bakwàbò bashiilèshiiàngàne bàà mu dyàpà dyènù. Nènku ngeela meeji ne nudi ne mpùngà mulenga wa dikèma mwab'ewu.

¹⁰ Mwva ànu ngeela meeji, dilòlò edi, pàmvwà musòmbe mwab'ewu mutàngile bantu apu. Nudi bamanyè's, àbìdì adi panshì aa netùjimìjè dyèsè edi. Nsangilu wa Maèkèleeziyà wa Buloba bujimà neàtùminè. Ndi ndicinkidila ne citùpà citàmbe bunène cyà batèèleji bàànyì dilòlò edi ncyenza ne beena Mpenta, ne ba-Baptistes, ne—ne beena Èglise de Dieu, ne aba bàdì pambèlu pàà Nsangilu wa Maèkèleeziyà wa Buloba bujimà awu. Ne—ne bóbò, ànu aci menemene ki màyelè àdìbo benzè, ne ki cìdì Bible mwambè ne nebènzè ncyòci aci. Kàdi twètù tudì badimwijiibwe bwà cyòci aci, pa nàнку tùshaalàayi kule naaci. Nènku ànu mùvwàbo bàmba dilòlò edi pa, mu musambu amu, pa bìdì bitàngilà Dilwa dyà Mukalenge dìdì pabwìpì edi, dìdì mwà kwikala pabwìpì kutàmba mutùdì twètù twela meeji ne mmùdìdi amu.

¹¹ Ne ndi ngeela meeji ne mpatùdì mwà kudìsanga pàmwè mu bwobùmwe bwà mùshindù ewu ebu, cìdì citwenzelakù cintu kampànda, cìdì citàmba kutùseemeja pabwìpì muntu ne mukwèndè. Nènku patùdì tutàmba kuseemena pabwìpì muntu ne mukwèndè apu, tudì kàbìdì tutàmba kuseemena pabwìpì ne Nzambi, bwalu Yesù wàkamba ne: “Mu mùshindù wunùdì benzèle bakesè bàà ku bapwekèlè Bàànyì aba awu, Mèmè ngunùdì benzèle awu.”

¹² Ndi ne mwànà mukesè wa balùme kaaba aka mu mwaba kampànda, ngeela meeji, Joseph. Ndi ne Billy musòmbe kaaba aka. Bàna bàà bakèjì bàbìdì basòmbe lwà paanyimà pààpa, ne mukàjàànyì. Mpindyewu bu ne muntu ùvwa ne cintu kampànda cìvwà...cyúvwàku ujinga kwenza cyà cilenga menemene, ndi ntàmba kujinga ùcyènzèlè bàna bàànyì pamutù pàà kucìngenzela mèmè. Ne pa nàнку ndi ndyùmvwa pàmwàpa ne, mèmè bu muledi, ne Yèyè ki mpokolo wa buledi, ngeela meeji ne mùshindù awu ngùdì Nzambi ùdyùmvwa. Bu byòbi

bikèngela bwà twètù . . . Tudi tuMukwàcila Yèyè mudimu patùdi tukwàcilangana mudimu muntu ne mukwèndè apu. Ki mutùdi tukwàcila Nzambì mudimu nàнку.

¹³ Ne bu mûndi mumanyè ne eci mbulelèlè, dîbà adi ndi ngeela meeji ne musangu wònsò wùdi dyâpà edi ditwilangana, bu mùdîbi ne ndiimàne pankaci pàà butangadiki . . . Ncyà bushùwà ne kakwèna dilongesha kampànda dîdi Beena Kantu-ku-byanza bàà Èvànjeeliyò mu Kaabujimà bàtwa nyama ku mikòlò to. Bòbò bàdi bàtwa nyama ku mikòlò ànu Èvànjeeliyò mu kaabujimà. Kàdi muntu yèyè ùpangakana, abi's bìdi ànu bîmpè menemene. Bìdi ànu bîmpè. Tudi ne bwobùmwe, nànsha bishi. Pa nàнку ndi ngeela meeji ne ncifwànyine kwikala . . . Bu ne mvwa musòmbèle mûneemu mu cimenga eci, ngeela meeji, pàdi dyâpà adi ditwilàngàna, bu ne kùvwakù mpùngà kampànda wa byènzekakù, mvwa mufwànyine kwikalàmù ne kufikishamù muntu yònsò ùmvwàku mwà kufikishamu awu. Ncyà bushùwà, bwalu ncintu cìdi—cìdi citupèèsha dikàndà pàmwe.

¹⁴ Mémè ntu musòmbèle mu Tucson, ne ntu ànu ngàakula ku misangu ne ku misangu mu dyâpà adi, dîbà dyònsò. Ne mu Phoenix, kacya ànu mmwangala nya ku Arizona, ntu mu Phoenix musangu wònsò wùntù mpeta mpùngà wa kuya ku—ku Phoenix, bwalu . . . ne nteetà bwà kulwakù ne muntu kampànda, kubiikila muntu kampànda, kwangata bakwàbò bambi.

Ne bàdi mwa kwamba ne: “Èè, èè, udi umòna's, Mwanèètù Branham, twètù katwèna.”

¹⁵ Mémè ne: “Nànsha wèwè . . . Lwâ tuye ànu ne mémè. Ndà bu—bu mulundà, pàmwe naanyi.”

¹⁶ Nèнку ndi ànu mbàfikishakù bwà katanci kakesè cyanààna. Ki cyònsò cìdi cikèngelà bwà wèwè kwenza. Ne bàdi bàjandule ne, mwoyi wa muntu yònsò wùdi ne nzala yà bwobùmwe. Nèнку bìvwa bikèngela bwà twètù kwikala twenzenza mùshindù awu. Ncimanyinu cinène cyà cikondo cyà nshìikidilu. Nzambì àbèneshekù dyâpà edi. Dishaalèku—dishaalèku too ne pààlwà Mukalenge Yesù bwà kutwàngata mu Butùmbi, ki disambila dyànyì ndyòdi adi.

¹⁷ Mpindyewu, ndi mvùluka lwendu lwànyì lwà kumpalà lwà kupicila mu Yuma. Mvwa mu kàshìnyì kàà Ford kàà Modèle-T kavwà mwà kwenza ntàntà wa kilòmèetà makùmi ànaayi ne mwandamukùlù ku dîbà dimwè. Mvwa ngeela meeji pàmvwà ndwa mu kàshìnyì leelù ewu apu. Mucikàle ànu ne lulamatu ku Ford; ki ùncicidi nende, ne ncitukù mupetà àà mushindu mukwàbo to ànu yèyè awu. Kàdi mémè . . . Mpindyewu mémè ncitu mpàànyisha tùshìnyì twà Ford to. Mpindyewu, aci ki ndiswishà dyà yèyè awu to. Nwamònu anyi? Kàdi ndi mvùluka mùvwà Ford . . . Bààbùngì bàà kunùdi nwènù bàna bèètù bàà mulongo wànyì mbavùlùke Modèle T wà kale awu. Mùvwà mmu cidimu cyà 1927. Bivwa bikukèngela bwà ùtangilè bîmpè

menemene cyanààna kùvwa mwà kumòna Yuma to pèèbè upicilamù. Kàvwa kakesè be, kàdi nukàadi bavulàngàne cyà bushùwà. Kàdi, mùshindù wùmvwa ngenza kilòmèètà makùmi ànaayi ne mwandamukùlù ne Ford wanyì awu, ùvwa wènza kilòmèètà makùmi àbìdì ne yinaayi ku dîbà mu *nùnkù*, makùmi àbìdì ne yinaayi mu *nàka*. Nànkù, nyìsangisha, mpeta makùmi ànaayi ne mwandamukùlù ku dîbà dimwè, ne bikùnàkùnà byànyì byònsò abi ne bikwàbò. Yuma wàlàbàdì.

18 Èkèleeziyà wa butùmbi ewu, utùdì, tudi—tudi tulwangana bwà Diitabuuja dilenga dyà dikèma edi.

19 Twasàkidila, mwanèètù, wenjì nànkù awu.

20 Wàlàbàdì pèndè, nènku tudi ne kusàkidila bwà bwalu abu. Mukalenge ànùbènèshèku bònsò.

21 Tudi tutèkemena ne, nwènù mu nyùngulukilu emu, pabwîpì ne, dyònsò dyà ku masangisha aa... Ndi ne—ne dyàpà mu Phoenix, bwà kwakulamù, mu dyàlumingu dilwalwà edi. Ne dyàlumingu dyàlondà ku Flagstaff. Ne dimwè dyàlondà, dyà matùkù makùmi àbìdì ne dimwè adi, nekwikalè didyà dinène mu Tucson. Nwènù bònsò nudi babiìkidiìbwè.

22 Nènku, bu Mukalenge mwà kwanyisha, ndi muswè kwakula ku cibambalu cyà bibilù cyà ku Cilààla-beenyi cyà Westward Ho, ngeela meeji. Ndilòòlò kaayi didici cibanga? [Muntu kampànda ùdi wamba ne: “Mmu dyàlumingu mu mapingaja, dyà matùkù dikùmi ne mwandamutekète.”—Muf.] Mu dyàlumingu mu mapingaja, mu matùkù dikùmi ne mwandamutekète, kaadisangisha kakesè kàà butangadiki. Ndi ntèkemena ne bimbi bàà misambu aba nebiìkalèku, pabwîpì ne cikondo aci, bwà kutùkwàcisha. Nènku netwikalèku dîbà adi too ne ku diisàtù. Ngeela meeji ne mmu dyàlumingu mu mapingaja. Ne tudi twenza nànkù bwalu katwàkucyàmanakù nànsha umwe wa ku ndongamu yà maèkèleeziyà to. Pashìishe, mu dimwè ne mu diibìdì, ne pashìishe mu diisàtù tudi ku Ra...ku West... ku Ramada Inn, Ramada Inn. Nènku pashìishe mu diinâyì netùbangilè ku Westward Ho. Mmwòmò anyi?

23 [Mwanèètù wa balùme kampànda ùdi wamba ne: “Westward Ho, mu dyàlumingu, mu dimwè, mu diibìdì. Pashìishe tuya ku Ramada Inn, mu diisàtù, ne tudi tushàalakù too ne ku mpungilu.”—Muf.] Mpungilù ùdi ùjika, ku Ramada Inn. Pa nànkù netwikalè ne disànka dyà kwikalakù neenù dîbà kanà dyònsò.

24 Mpindyewu, kumpàlà kwà twètù kukùdimukila ku Mukàndà ewu, twànjì twìnyikàayikù mitù yètù bwà katanci kakesè cyanààna bwà kwakula ne Mwenawù.

25 Mpindyewu, ne mitù yètù miinyika ku lupwishi kùvwa Nzambì mutwängàte, nènku, bu Yesù mwà kunènga, bìdì bikèngela bwà twètù kwalukila mùshindù awu dîngà ditùkù. Kacya ànu ngáfika kaaba aka, ndi mupetà mukenji wà ku

esètè, ne inábànzà mutekète úmvwa mumanyè. . . Yèyè mmwàná mukèsè wa bakàjì dyèndè ng'Edith Wright. Mmusabùke muyè katwilangana ne Nzambì, mu mapingaja emu, pa díbà isàtù jaajaaja. Bìdì bikèngela bwà twètù kwalukila. Kwòkò muntu kaaba aka udi muswè bwà bàmvùlùkè mu disambila, swàku wèlè ànu cyanza cyèbè muulu kùdì Nzambì. Nzambì àkubènèshè.

²⁶ Taatù wa mu Dyulu, bu mutùdì basànkile bikolè bwobùmwe bulenga ebu, twimba misambu, kaa, mùshindù mwinè wùdici citùpìshe mwoyi wanyì ne disànka pàngàtèèleji musambu awu wà ne: *Yone Úvwakù Mummòne Mémè Anyi?* Taatù, ndi mutwishìibwe ne netwìkalèmu bònsò, yònsò wa kutùdì. Nènkù tudi biinàme mpindyewu batàngile ku lupwishi, ne tudi—tudi tulòmba bwà Wàkidilèku disàkidila dyètù—dyètù, ne kanyinganyinga kèètù, ne disambila dyètù bwà muntu ne mukwèndè.

²⁷ Nènkù mpindyewu tudi tubuulula Dìyì Dyèbè, citùpà cinsantu cyà disangisha cìdì cìmwèka cinsantu kutàmba—kutàmba bikwàbò, bwalu tudi bamanyè ne mu cikondo eci tudi tukwàta mudimu ne bantu, bwà kubàlombola ku Bulelèlà, kùdì Kilistò ne ku Dìyì, dìdì Kilistò adi. Nènkù tudi tulòmba bwà Wèwè kutùkàngwilakù Dìyì. Ka—katwèna bakùmbàne to, Mukalenge, kàdì Wèwè ngudi mukùmbàne mu byònsò. Pa nànkù ndi ndòmba bwà Úbeneshèku didifilà dyètù ditekète edi, nènkù swàku dilòòlò edi tùdijandùlè ne tujingululè kaaba kèètù mu Dìyì dyà Nzambì. Enzàku nànkù, Taatù. Nènkù netùKupè butùmbi, bwalu tudi tulòmba nùnkù mu Dìnà dyà Yesù. Amen.

²⁸ Mpindyewu, mbilenga be bwà kwikalakù kaaba aka. Ndi ne tuntu ndambù tùndì mufùnde mwab'ewu tùndì mémè ngeela meeji ne ndi mufwànyine kwikala ngenza kwòshakù dísù, bwà tusunsa tukesè, bu mùndì ncìyì ncinka ne mbatwitàbile bwà kulama cibambalu eci mukùngùlù mule menemene dilòòlò edi nànsha. Ne mémè pàanyì, ndi mwènze ànu bu ne, munkacì mwà beena Mpenta, ntu ànu bu udi ne lujòòkò, nudi bamanyè's.

²⁹ Ndi mvùluka. Nkàadi munwàmbile, pàmwàpa. Pàmmwènè mwambi wa beena Mpenta musangu wà kumpàla, ùvwa n'Révérend Robert Daugherty wa ku St. Louis. Ndi ngeela mpatà bwà ne nànsha umwe wa kunùdì ùvwakù mumumanyè. Nwamònú bujaadiki bwà mwanèndè mutekète wa bakàjì mu mukàndà awu. Yèyè ùvwa—ùvwa. . . Mwanà wa bakàjì awu wàkondopiibwa disaamà dyà St. Vetus, ne bàvwa bamwelè làà. Nènkù ki mungààkatwilanganà ne beena Mpenta bàà kumpàla nànkù awu.

³⁰ Nènkù, ewu, ngàkaya kamutèèleja ùyiisha, ne—ne, ekèlekèle, yèyè's—yèyè's ùvwa mwà kuyiisha. Úvwa mufwànyine. . . Kàvwa mene mwà kwindilakù kantu nànsha kàmwè to. Nènkù ùvwa mwà kuyiisha too ne muvwà lupeepèlè lùmupàtuka lwònsò, ne kwìsù kùlwa bleu, ne binù byèndè bìvwa bituutakana,

mufwànyine kulenga ne panshi. Ne ùvwa mwà kulaminyina mweyelu, nuvwa mwà kumuumvwa ku ndekeelu kwà cimenga kwinshi kwàka, mene's, ùbànduluka wènda ùyiisha. Ki mèmè kudyàmbidila ne: “Ekèlekèle, ncyèna—ncyèna ànu mwà kucyelelakù meeji ne lùkàsà lwà mùshindù wàwa to.”

³¹ Mèmè bikèngela ànu ngangàte dībā dyànyì. Mèmè ntu bu udi ne lujòòkò, kàbidì, ngenda nkùlakaja, nudi bamanyè's, ngenda ndikòka, nàнку ndi ntèkemena ne nenùntwàlèku mu tusunsa tukesè.

³² Kùdi cintu cimwèpelè cyà bushùwà, cìndì mèmè mumanyèku ne kacyàdyàkupangilaku to, ki Dìyì Dyèndè. “Maulu ne buloba nebijiminè, kàdi Dìyì Dyèndè kadyàdyàkupangilakù to.” Pa nàнку tubuulààyaaku mpindyewu, panwikalà ne Bible wenù, ne baswè kubalaMù, mu Mukàndà wà Yeshàayi, nshapità wa 53 wa Yeshàayi. Ndi njinga kubala cyòci eci ànu bwà kwibaka, kupetakù cyena-bwalu bwà kwibakilapù dyumvwija, bwà katanci cyanààna.

Nganyì udi mwitàbùùje mulubù wètù?...nkùdi nganyì kùdi dibòkò dyà MUKALENGE dibuulùdùbwe?

Bwalu yèyè neàjuuke kumpalà kwèndè bu cikùnyùbwa citekète, ne bu muji wùpàtuka mu buloba bàmè: yèyè kèna ne mmwènekèlu anyi ne dikòka dyà ntèmà to; ne patwàmumònà, kakwèna bulenga bwà bikèngela tùmujingè to.

Yèyè mmupeatula ne mubèngùbwe kùdi bantu; mulùme wa tunyìnganyinga, ...mwibidìlàngàne ne lutàtù: ne twàkasokoka mpalà kumpalà kwèndè; ùvwa mudyombòla, ne twètù katwàkamutwà mushinga nànsha.

Cyà bushùwà yèyè ngudi mwambùle ntàtù yètù, ne mwambùle tunyìnganyinga twètù; kàdi twètù kumubala bu munyookùbwe, mutucùbwe kùdi Nzambi, ne mutàcishùbwe.

Kàdi yèyè wàkatàpiibwa mpùtà bwà kushipa kwètù kwà mikenji, wàkazaajùbwa bwà bubì bwètù: dinyooka dyà ditalala dyètù dyàkapòna pambidi pèndè; ...ku mibùndàbùndà yèndè twàkondopiibwa.

Twètù bònsò bu mìkòòkò twàkapàmbùka; tudi bakùdimùkile muntu ne muntu ku wèndè njila; ne MUKALENGE...wàkatèeka bubì bwètù bònsò pambidi pèndè.

Wàkacìncimikiibwa, ne wàkatàcishùbwa, kàdi kààkabuululakù mukana to: bàakaya nèndè bu mwànà wà mùkòòkò ku cishipeelu, ne bu mùkòòkò kumpalà kwà bawùkòshi bàà myòsà mwikàle kamàmà, ...yèyè kààkabuulula mukana nànsha.

Wàkuumushiiibwa mu bùlokò ne ku cilumbulwidi: kàdi nganyì wàmbila lukòngò lwèndè? bwalu wàkuumushiiibwa pa buloba bwà bàdì ne mwoyi: ne bwà...kushipa kwà mikenji kwà cisàmbà cyànyì yéyè wàkatuuciibwa.

Ne wàkenza bwà lukità lwèndè kwikalalù pàmwè ne beena lwonji, ne babanji mu lufù lwèndè; bwalu yéyè kì mmwenzè bwalu bwà ciputuku nànsa bùmwè, nànsa diseeswishangana kadìvwakù mukana mwèndè amu nànsa.

Kàdi byàkasànkisha MUKALENGE bwà kumuzaazayè; yéyè e kumufikishayè ku dibungama dikolè: pawàvwiijà musùukà wèndè mulàmbù bwà mpèkaatù, yéyè neàmònè dimiinu dyèndè, ne nealepeshè matùkù èndè, ne disànkà dyà MUKALENGE nedìtantè mu byanza byèndè.

Yéyè—Yéyè neàmònè byà ku didìnyèngà dyà musùukà wèndè, ne neikalè musànkishiiibwe: ku dimanya dyèndè musadidi wanyì mwakàne neàbingishè bàabùngì; bwalu yéyè neàmbulè bubì bwàbò.

Kì bwà cinyì mèmè nèmmwabànyìnè citùpà cyà banène, neàbanyanganè bintu bipàwula mu mvità ne beena makàndà; bwalu yéyè...wàkiicikija musùukà wèndè too ne ku lufù, ne wàkabadiibwa pàmwè ne bashipi bàà mikenji; ne wàkambula mpèkaatù yà bàabùngì, è kwenza dyakwilangana bwà bashipi bàà mikenji.

³³ Ndi muswè ànu ngàmbè nùnkù, ànu bwà kaacyena-bwalu kakesè cyanààna. Ndi muswè kwangata cyena-bwalu ku cyòcì aci, cyà ne: *Mudimu Mwowela Byanza Wà Nzambi Mumanyishiiibwe.*

³⁴ Mpindyewu, eci ncifwànyine ànu kwikala cye—cye—cyena-bwalu cyètù cyà kubala eci, bwà kupàtula mudimu kampànda mwowela byanza. Kàdi patùdì tucitàngila, mutùdì bafwànyine kwela meeji, ncifwànyine kwikala cingà cintu pa kuumusha mudimu kampànda mowela byanza, bwalu ncyambè ne: “Twàkasokoka mpàlà yètù kumpàlà Kwèndè, ne kakùvwakù bulenga butùvwà mwà twètù kuMujingila to.” Ne misangu yàbùngì, citùdì bafwànyine kubiiikila ne mmudimu mwowela byanza aci, pàvwà Nzambi kàyi mufwànyine kwikala ne cintu nànsa cimwè cyà dyenza naaci to. Bwalu, lungènyì lwà muntu ndikùtakana kùdì Nzambi, kàdi dikùtakana dyà Nzambi didì ne lungènyì kutàmba lungènyì lwònsò lwà bantu.

³⁵ Nènku tudi tumòna mwómò emu ne, Nzambi mmutùpèèshe cimfwànyì cyà cintu kampànda. Ndi muswè kuteetakù bwà kutwàla cimfwànyì eci kumpàlà kwètù, bu mùndì mfika ku dymvwa ne ncifwànyine kwikala musangu wà ndekeelu

wùdi bàmwè bàà kutùdi bàdisangisha. Tudi mwà kubènga kumòngana cyàkàbidi muntu ne mukwèndè mutùdi bàdisangishe mpindyewu emu. Ki bwà cinyi, pìikalàbi ne tudi bàdisangishe mu kiipàcilà aka, kabiyi bwà kwikalabò batùmòna anyi bwà kutùmvwabò. . .

³⁶ Kàdi tudi benzè bwobùmwe bwètù muntu ne mukwèndè patùvwà tufila cyàkudyà cilenga eci dilòlò edi apu, ku mèèsà eku, patwàdiishi mibidi yètù yà musunya apu, nènku mpindyewu tudi baswè bwà Nzambi àdiishè musùkà wètù ne Manà Èndè àdi masokoka awu. Ànu bakwidi bààbwedi mu mwaba mutàmbe Cijila abu kì bàdibò baanyishile bwà kudyà Cyàkudyà Cyèndè.

³⁷ Nènku bu twètù mwà kumòna, dilòlò edi, cyàkudyà cyètù—cyètù cyà cifwètekè eci, Ncyèna ngeela meji ne nkààdiku mudyè di—didya dinènè dyà mikùukùku, mu myaba yònsò yínkaadiku mwenzènze masangisha ayi, bu mùdi dilòlò edi, mùnkààdiku mupetè dibùlu dimpè dyà cifwètekè dyàbwena divwàbo bààbanya dilòlò edi to. Mpindyewu, nudi numòna's, bwalu bìvwa bikèngela twètù kwikala ne cyòci eci; pìikalàbi ne tudi mwoyi, bìvwa bikèngela bwà cintu kampànda kufwàci bwà twamòna mwà kusànkila cikondo eci cyà bwobùmwe, ne kukwàcisha kabidi myoyi yètù.

³⁸ Mwawa nyiikilangana ne muntu kampànda utu mudì wa bisèkiseki nkààyaabi, ànu àbidi àdi panshi aa, ki kungambilayè ne: “Èè, mèmè—mèmè ncyèna mpetangana neebè ku mèyi to.” Èè, yèyè—yèyè kwenza bu mumpèèshè mukàndà mumfùndila's, mwikàle ùjinga bwà kutwilangana naanyì pèètù pàà bàbidi. Ki yèyè ne: “Mwanèètù Branham, mèmè's ntu ànu nkwangata bu muntu wa cijila.” Yèyè ne: “Kàdi pàndi muumvwè wamba mùvwa mudyè munyiinyi wà ku cibelu cyà ngulube ne mayi bu cyàkudyà cyà mu dindà,” yèyè ne, “aci—aci kàdi kuntekeshaci mu maboku's.”

³⁹ Èè, aci, ncyènakwè mufwànyine kuteeka dibwe dyà cilèndwishi mu njila wendè to. Mpindyewu, awu's ngwèndè pèndè mùshindù wà kwitabuuja. Kàdi mèmè kwamba ne: “Èè, mukalenge, mèmè nciyi mudyè to, nyèna ne mwoyi to.”

⁴⁰ Yèyè kwamba ne: “Kàdi, udi umòna's, s'bvwa bikèngela wèwè kudyà ngulube, ne—ne kushebeya nzòlò.”

⁴¹ Mèmè ne: “Mukalenge, s'tudi ne mwoyi ànu ku bintu bifwè. Cyùdi udyà nànsha ciikàle cinyi. Udi udyà bisèkiseki. Utu udyà. Wèwè udyà dyàmpà, blé's mmufwè. Wèwè udyà ditalà, ditalà's ndifwè. Wèwè udyà nkunde, nkunde's mmifwè.”

⁴² Cyònsò cyúdyadyà, udi mwà kwikala ne mwoyi mu mubidi ànu bwalu cintu kampànda ncifwè bwà wamòna mwà kwikala ne mwoyi. Mpindyewu, cyònsò cyùkènji, nànsha kunwà mabèèle, twishi, nì ncinyi cyònsò, bikèngela wikalè ne mwoyi ànu ku bintu bifwè. Nènku bidi ànu bileeja ne, byòbi bikèngela bwà twètù kwikala ne mwoyi wà mu mubidi ewu, ne ànu ku bintu

bifwè nkutùdi mwà kwikala naawù, bìvwa bikèngela bwà cintu kampànda kufwàci bwà twamòna mwà kwikala ne mwoyi Cyendèlèlè. N'Yesù Kilistò, udi Nzambi mufile bu cyà bupikudi bwètù twètù.

⁴³ Nènku mpindyewu, pàngààkapetanganà ne beena Mpenta bwà musangu wà kumpàla, Mwva—mvwa muyè ku Californie, ànu ditùnga ditwàngaji mwab'ewu edi, dyàmwàmwà dyà musùlu. Nènku mvwà nsanganyiibwa mu Los Angèles. Ncìvwakù ne mwoyi mu matùkù a mwambi mukàji mwendè luumù ewu to, Màndàmù Semple . . . Aimee Semple McPherson awu. Mémè kufika ku ditwilàngana ne mwanèndè wa balùme, Rolf, mwena Kilistò wa bukàlànga, ne—ne mukàjèndè ne dìkù dyèndè. Ncyà bushùwà ne mbantu bàà maalu malenga, ne Docteur Teeford ne bààbùngì bàà ku musùmbà wà mu Angelus Temple awu. Nènku mvwa muyiishè Cibilù cyà disànkà cyà Mpenta, Cibilù cyà disànkà cyà bidimu makùmi àtaanu kuntwaku, kùkaadi ndambù wa bidimu, ne ncyà bushùwà ne ngàkápìcila mu cikondo cilenga cyà dikèma.

⁴⁴ Nànku bwà kuneemeka mukàji ewu wàkafila cilejilu mwàkacìfilàye amu, bwà kuteeta ne mwèndè mwònsò, ne ku—kuleeja cìvwà mu mwoyi wèndè, ngàkamutwà mushinga pa kuya ku lukità lwèndè ku Forest Lawn kwàka. Nènku pàmvwà mwimàne mwaba awu ne cifulu cyànyì citùùla, ne—ne kwinyika mutù ne kusàkidila Nzambi bwà nsòmbelu mulenga wa mwena mudimu mukàji mukèsè ewu, Kundòmbàbu dìbà adi kùdì musùmbà wùmvwà naawù awu, kasùmbù kàà bambi aku, ní mmvwakù mufwànyine kwenza lwendu lwà mpìcila mu . . . bwà kupìcila mu Forest Lawn mwònsò amu. Kàdi munda mwà nzùbu wa dilamina bitàlù amu, anyì mwònsò munùdì nucibìikila amu, mvwa mbandila mazòlà mashìilèshìilàngàne, ne mémè kumòna Didya dyà Mukalenge, ne kushàalapu. Bààbùngì bàà kunùdì bàkaadi bacìmòne, pàdìbo bacìmunyika ne bukènkè, Didya dyà Ndekeelu, ne bumvwè bwalu—bulonda bwà cyòci aci.

⁴⁵ Kàdi cìmwè cyà ku bintu bitàmbe kwikala byà pabwàbì bìngààkamònamu, cìvwa mpaùdi ubwela ku ciibi, ngeela meeji ne ncìfwànyine kwikala ku luseke lwà ku esètè. Kùvwa lu—lupìngù lwà Mòsà lutèèkà mwaba awu, lùvwa mudimu wà mu katòngòbèlè wà Michel Ange, Ngeela meeji ne mmvwàbì's, musongì wà lupìngù alu. . . Ndi mwà kwikala mutùpàkàne bwà muntu awu, ngeela meeji ne mmwòmò, Michel Ange, awu—awu. . . musongì munène wà mpìngù uvwa mufwìmbe lwòlò alu awu, anyì, cìmfwànyì cyà Mòsà. Nènku pàvwàye ùbùmvwijacì apu, mu—mulombodi uvwa utwèndesha awu, wàkamba ne awu wùvwa ngùmwe wà ku midimu myowela byanza mitàmbe bunène yìvwàku Michel Ange mufwìmbe. Ki yèyè ne wàkamwangata matùkù èndè à mwoyi àbùngì, mudimu mukolè.

⁴⁶ Pashìishe mémè kumòna, ngeela meeji ne pàvwa mpa

cinù cyà dyàbalùme. Lupìngù lùvwa lùmweka lupwàngàne, lufinùnùke, ne Mòsà mwikàle ne mabwe à mikenji mu cyanza, ne mwedi wèndè mule. Nènku cìvwa, mu bushùwà bwà bwalu, didifwikakakajila dyà Michel Ange, dyà mùvwà Mòsà ne cyà kwikala. Pàmwàpa kacya kàvwakù mwanji kumòna cimfwànyì aci to, kàdi, mu meeji èndè yèyè mwinè, wàkazòla cìvwàye mwwelè meeji ne ki mùvwà Mòsà ne cyà kwikala.

⁴⁷ Nènku bwalu bùdi bùlonda ne, mmwenzè ànu ù—ùjikija lupìngù alu, ùlùkùpula lwònsò mu mùshindù mupwàngàne, kwimanayè pa bule bwà kubandilayè mudimu wèndè awu. Ne pàakalwàye musonsòdiibwe, mu mùshindù wà ne lwàkatàmba kufwànàngana... Cìvwàye naaci mu meeji aci, wàcyènji ne cyanza cyèndè. Lùvwà lufwànàngàne bikolè naaci, ne bidimu byònsò abi ùvwa mucìndile, mu mùshindù wà ne mutàmbe kwambwibwa mu disonsodiibwa, wàkalùtuuta cintu pa cinù ne kwela lubilà lukolè ne: “Akùlà!” Nènku ki kaaba kàdi kapandike pa mu—mukòlò, pa cinù cyà Mòsà nkòkò aku, mwaba wàkatuutà Michel Ange nsandu wèndè awu, bwalu ùvwa mutàmbe kusonsodiibwa.

⁴⁸ Nwamònu’s, kùvwa cintu kampànda munda mwèndè amu, ku cibangidilu aku, cyàkenza ne àzole cimfwànyì cyà mu mutù cyà mùvwàye wèla meeji ne ki mùvwà Mòsà ne cyà kwikala. Nènku mmwenzè ànu ùcimona cileejiibwe kumpàlà kwèndè, cintu mene cìvwàye naaci mu meeji aci, cìvwàye wèla meeji ki mùvwà Mòsà ne cyà kwikala aci; ne mulàma cikèèna—kumòna aci bidimu ne bidimu byònsò abi, ne mwàkangatayè cipese cinène cyà dibwe dyà granite, è kukòsayè kapese apa ne kapese pàapa, ne kubifundayè, bwalu bivwa bikèngela bwà kulwaci cipwàngàne. Nènku pàakavwijiibwàci cipwàngàne kumpàlà kwèndè, yèyè—yèyè kumòna cimfwànyì cyà cìvwà mu meeji èndè. Ki cìvwà cimusionsòle bikolè, bwà kutuutayè cimfwànyì aci, ne kwelayè lubilà lukolè ne: “Akùlà!” Bidimu byèndè byònsò byà mudimu mukolè byàkafila difutu. Mudimu wèndè munène wà byanza wàkajika.

⁴⁹ Mpindyewu tudi tumòna aci, ne mèmè—mèmè kusonsodiibwa kùdi cyòci aci, bwalu ngàkadyàmbidila ne, mu bulelèlè, cimanyinu aci pa mukòlò, cyàkacyènzà, bwànyì mèmè, mudimu mwowela byanza. Bwalu, ànu, bu ne cìvwa ndizòla dikwàbò, anyì cintu kampànda cyà Mòsà, cimfwànyì cyà mùshindù kampànda cìvwà muntu kampànda mufwikàkàje. Kàdi, muntu uvwa wenza mudimu awu awu, byàkamusànkisha bikolè mu mùshindù wa ne wàkalùtuuta. Ne cimanyinu cyàlù aci ncyàkalùvwijà mudimu mwowela byanza bwànyì mèmè, bwalu cyàkaleeja mu mùshindù mupwàngàne cìvwà mu meeji èndè ne ki mùvwà Mòsà ne cyà kwikala.

⁵⁰ Kaa, mèmè kwimana mwaba awu. Byàkakèngela bwà ngùumukèku ndambù wa tusunsa, bwà kwelakù meeji pa—pa cìvwà cyòci aci ne cyà kwikala cyumvwije bwèndè yèyè,

ne—ne cìvwàci cyumvwije bwànyì mèmè mwine musangu awu. Pashìishe kumvwilaci mu meeji, bwà cìndi njinga kunwàmbila eci.

⁵¹ Twànji tùmushààyìkù meeji mpindyewu kùdi Michel Ange, tuàtàngijè kùdi Musongi munène wà mpingù, Nzambi wa Bukolé Bwônso, Úvwa, ku cibangidilu, kumpàlà kwà kwikalakù ditùkù anyì kabundubundu kàà ditùkù, kumpàlà kwà kwikalakù kapwishipwishi anyì kasùnsukilà, Nzambi, mu meeji Èndè, ùvwa ne muntu, mùvwà muntu ne cyà kwikala, cìvwàyè ne cyà kwikala, ne mùvwàyè ne cyà kwenza maalu. Nènku Úvwa muswè bwà muntu awu ìkalè citùpà cyà ku Yèyè ne: “Pa nàнку Wàkenza muntu mu cimfwànyì Cyèndè sungasunga, ne mu difwànangana ne Nzambi ki mwàkafùkaYè muntu,” okaa, pàvwà Nzambi, ku cibangidilu, mwenzè mudimu mwowela byanza ewu, cintu kampànda cìvwà cileejà patòòke meeji Èndè.

⁵² Vùlukààyì ne, kùdi mùshindù wa Mwoyi wa Cyendèlèlèlè ànu wùmwpèlè, ne ètù. . . nànsha mènà ètù ne meeji ètù àvwakù ne Nzambi kumpàlà kwà difùkà dyà dyulu ne buloba. Bwalu mpindyewu tudi ne Mwoyi wa Cyendèlèlèlè. Ne bwà kwikala cyòci aci, bikèngela twikalè citùpà cyà Nzambi. Pa nàнку bìvwa bikèngela twètù kwikala too ne mu meeji Èndè, bwalu tudi ne Mwoyi wà Cyendèlèlèlè, ne tuvwa badyànjlila kulongolwela mwoyi ewu. “Ne mènà ètù àkafündiibwa mu Mukàndà wà Mwoyi wà Mwànà wa mùkòòkò kumpàlà kwà difùkà dyà dyulu ne buloba,” bilondèshile Bwàkabuulwibwà. Mpindyewu, Nzambi awu ùvwa neetù mu meeji Èndè, díbà adi tudi ne Mwoyi wà Cyendèlèlèlè, bwalu díbà adi Yeyè wàkatùtùndùbula ku díyì, pèètù kufika ku diikalakù. Ne díyì didi ànu meeji mamwènèshìibwe. Nzambi ùvwa neetù, ku cibangidilu, mu meeji Èndè.

⁵³ Mpindyewu, ne pààkenzàYe Adàmà, muntu wa kumpàla awu, mùshindù mene wùvwàbi bipwàngàne’s wè. Úvwa mufwànàngàne ne Nzambi. Nzambi, Nyumà Mwìmpè munène awu, mwikàle ùlààdila pa buloba, ne Yèyè. . . nyuunyi kupàtukayì, pàmwàpa, ne nyama, bintu bishìilèshìilàngàne, è kutùngùnuka ne kutàmba kwangata mmwènèkelu wa Ewu uvwa munkaci mwà kulààdila awu. Mu mùshindù wà ne, ndekeelu wa byònsò, kulwakù cìfùkiibwa cyà mùshindù mufwànàngàne ànu menemene ne Yèyè uvwa ulààdila awu, Nzambi. Nzambi ùvwa, anyì, muntu ùvwa mwenza mu cimfwànyì cyà Nzambi. Pashìishe, pààkamutèèkàYe mu budimi bunène ebu, mwàkatèèkà Michel Ange mudimu wèndè munène wà kacya bààmùlela awu, ne mwàkènza basongi banène bàà mpingù bònso, Nzambi wàkatèèka mudimu Wèndè wà byanza mu budimi bwà Edènà, kumwenzela mumukwàcishi. Ndisànkishiibwa kaa—kaa—kaayipu dikùmbànàngàne òvwà kùdi Nzambi, mu mùshindù wa ne Wàkiikisha ne diikisha. Cìvwa ànu diikisha. Mudimu Wèndè wùvwa mujikè.

Pashiishe ki bwalu bwà dibungama kulwabù, bwà kùdi mulwishì.

⁵⁴ Mpindyewu mònaayi. Cintu cimwèpelè cìndì njinga bwà nwênù kulama mu meeji, ncyà ne Nzambì wàkapèèsha muntu ewu dikùbiibwa. Wàkamupèèsha . . . Wàkamukoleshila munda mwà Dìyi Dyèndè, bwalu Wàkabàmbila cìvwàbo mwà kwenza, ne cìvwàbo kabàyi mwà kwenza.

⁵⁵ Ne pa cishìmikidi cimwècimwè aci mpatùdi batèèkìibwe leelù ewu, citùdi mwà kwenza, ne citùdi katùyi mwà kwenza. Nànsha twètù biikàle bimpè bàà bìshi, nànsha tuya mu èkèleeziyà bìshi, anyì twenza *cikampànda*, bìdi bikèngela tùlediibwe cyàkàbìdi. Nwamònu anyì? Bìdi ne cyà kwikala nànkù.

⁵⁶ Nènku Nzambì wàkambila Adàmà cìvwàye mwà kwenza ne cìvwàye kàyi mwà kwenza. Wàkamutèeka paanyimà pàà Dìyi Dyèndè.

⁵⁷ Ki pashiishe mwena lukunà kubwelayè, ku diseeswishangana, ne kudifindayè wènda ùkalaba ku bimanu byà Dìyi dyà Nzambì, bwalu ciibi cìvwa cimuunzulwila, ki kunyangakajayè cimfwànyì aci, kucìvwija mpèkaatù. Ki bùmwe bwà ku maalu-malonda à matàmbe kwikala à dibungama mbwòbù abu.

⁵⁸ Bwà kwela meeji ne, muntu wàkenjiibwa mu cimfwànyì cyà Mufùki wèndè, ne wàkapèèbwa cimanu bwà kwimanyina paanyimà pààci awu, bwà ne Dìyi adi kadivwakù mwà kupangila to nànsha kakesè. Ki—ki ditèkemenà dyà mwena Kilistò ndyòdi adi. Dìdi wèndè—wèndè ngabu. Ki byèndè byà mvità. Ki lubwebwe lwèndè leelù ewu, lùdi ne, kushààla paanyimà pàà Dìyi; mwena kwitabuuja yònsò.

⁵⁹ Mpindyewu, kwènàku ne cyà kuumuka paanyimà pàà Cyòci aci to. Paùdi umukapù, wèwè, udi ukàngwila mwena lukunà ciibi, pàdìbo bàmba ne: “Kaa, èè, udi mwà kwenza ndambù wa *cikampànda*, ne ndambù wa *cikansanga*.” Nzambì mmuswè bwà wèwè kutàpuluka ne cyònsò cìdi cibìikidiibwà ne mmpèkaatù. Mutèèkìibwe mu kaabujimà ku luseke bwèndè Yèyè, ne bwèndè Yèyè nkààyendè.

⁶⁰ Yèyè udi ne kiipàcilà mu nsòmbelu webè, muntu-nkààya yònsò, mu mùshindù wà ní nganyì ní nganyì mukwàbò yònsò pa buloba apa kàyìkù mwà kwangatakù kaaba kèèbè to. Nzambì udi ne cintu kampànda bwèbè wèwè. Udi mwenjiibwe mùshindù awu. Uvwa mwenjiibwe mùshindù awu mu kiipàcilà. Nzambì mmudishikàmìne mu mudimu Wèndè. Yèyè mene . . . Bintu bìdi bìshìilàngàne. Tutu bashìilàngàne, muntu ne mukwèndè.

⁶¹ Tudi tumòna mu mwoyi wà bukwànyama. Tudi tusangana ne, mu mwoyi wà bukwànyama, kùdi nyama umwèpelè, Nzambì wàkenza nyama kampànda mwambudi wa majitu, bu mùdi kabalù, ne—ne kòkò bikèngela kàkwatè mudimu. Kàdi ngombe

yêyè ndidifila. Nènku, kàdi, nta—ntambwe ne cisùmpàntambwe yidi yèndakana mu diitu kayiyi ne mudimu mukolè anyi cintu kanà cyònsò. Yêyè mmwenzè nyama munènaanènààlè bu mùdi nzevu, kàdi pashiishe kwenza kalùmyànà kakesè bu mùdi kapùku. Mpindyewu, nganyì udikù bwà kwambila Nzambì cyà dyenza ne mwà kucyènza? Yêyè ùdi ùcyènza mu mùshindù Wèndè Sungasunga.

⁶² Ne Yêyè ngudi wenza mikùnà. Ùdi wènza bipèèlà. Ùdi wènza mâ—mâyì a mbû. Ùdi wènza mpàta. Ùdi wènza mucì wà mùshindù kampànda, dibaya dishilè, dibwè dyà ngajì, ne—ne bikwàbò. Yêyè ngudi ucyènza.

⁶³ Ùdi wènza bantu bashiilàngàne. Ùdi ùtupèèsha, muntu ne muntu, mwaba mushiilàngàne. Ne dibwè dyà ngajì kadyèna mwà kwikala mucì wà hickory to. Mucì wà hickory kawèna mwà kwikala dibwè dyà ngajì to. Muntu nànsha umwe kèna mwà kwangatakù kaaba kèèbè to, ne kabivwa bìkèngela bwà wèwè kuteeta kwangata kaaba kàà nì nganyì nì nganyì mukwàbò yònsò nànsha. Bwalu, wèwè udi muntu-nkààyà, bwà Nzambì, ne Nzambì udi neebè ne kiipàcilà. Yêyè ngudi mukwenzè mùshindù awu. Wèwè udi wamba ne: “Wàkacyènza bwà cinyi?” Yêyè mmudishikàmine. Yêyè ùdi ne kabingilà bwà biikalè mùshindù awu.

Kàdi tudi tusangana ne twètù bònsò tudi balamiibwe kùdi Dîyì.

⁶⁴ Mu dyulu, tudi tutàngila mibidi yà mu dyulu. Bible ùdi wamba ne nànsha mene mùtootò wùmwè mwinè mmushiilàngànekù ànu ne mukwàbò. Kùdi Sirius ne mikwàbò mishiilàngàne. Ne Mars ne Jupiter, yònsò mishiilèshiilàngàne ayi, mmishiilàngàne ewu ne ewu. Dibà ndishiilàngàne ne ngondo, ne ngondo mmushiilàngàne ne mitootò. Ne kùdi Banjèlo, bu mùdi, kùdi Baselèfima ne Bakèlùbà, ne Banjèlo ne Banjèlo banène, mu—mu bipidi byàbò. Ne nànsha mu buloba bupyabùpyà bùcilwalwà, bamfùmù bàà pa buloba bàdi bàtwàla buneemè bwàbò mu cimenga aci.

⁶⁵ Ki mutwikalà nànu awu misangu yònsò. Bwalu Nzambì kì n’Nzùbu wa Sears ne Roebuck Harmony nànsha. Yêyè ùdi Nzambì wa nkòngo nè nsanzu. Ùdi wènza ewu mùshindù, ne mukwàbò mùshindù. Kàdi tudi ne cyà kuMukwàcila mudimu mu mùshindù wùdi Nzambì mutwènzè awu, ne kwikala ne disànka, ne kushàala paanyimà pàà Dîyì Dyèndè. Nènku mùshindù awu ki wàkacyènza Nzambì.

⁶⁶ Kàdi patùdi tujandula ne mwena lukunà wàkapìcila ku Dîyì adi, ku cyòci eci, mudimu wà byanza wà Nzambì ewu, yêyè kucinyangakaja. Nènku ki cidiye munkaci mwà kwenza mpindyewu menemene ncyòci aci. Ùdi ùdifindila ku mudimu wà byanza awu, mwena lukunà awu’s, ùteeta bwà kutùvwija Nsangilu wa Maèkèleeziya à Buloba bujima. Ne muntu ùdi

ne. . . Mòna's, muntu kèna nànsha mwà kwitabangana ku mèyi ne mukwèndè to, mmunyi mutwàfikishà buloba bujimà ku diitabangana ku mèyi ne muntu kampànda? Nènku panùdi ànu ne nwenjì aci. . .

67 Tudi ne Umwèpelè ùtudi ne cyà kulamangana nendè mu dyumvwangana, n'Nzambì. “Ne ku cibangidilu kwàkadi Dìyi, ne Dìyi dyàkadi ne Nzambì, ne Dìyi dyàkadi Nzambì.” Ne Dìyi didi dishààla ànu Nzambì, ne nedìikalè misangu yònsò ànu Nzambì, bwalu Nzambì ùdi mu Dìyi. “Ne Dìyi dyàkavwijiiibwa mubidi ne dyàkasòmbela munkaci mwètù,” mu Mupèsonà wa Mwànà wa Nzambì.

68 Mpindyewu tudi tusangana, ne, paanyimà pàà Yèyè mumanè kujandula dinyangakaja dinène edi, kumwèkabi bu ne, bu biikala wèwè ne mèmè, paanyimà pàà bamane kwelamu dibà dyònsò adi ne diditàcisha dyònsò adi, nùnkus' tudi batwè cintàkanyì aci musèbà bacilekèle ciya ànu nànkù, kàdi, kì n'Nzambì to, Kààkaswà Yèyè kulekela mudimu Wèndè awu wùya ku kabùtù nànsha. Ki dinanga dyà Nzambì ndyòdi adi. Kabyèna bikèmesha to pàakambà mwedi wa kasàlà awu ne:

Bu tuvwa bafwànyine kuuja mbù ne màyi à mufùndù,
 Ne bu maulu mwà kwikala mavwijiiibwe cisèbà cyà kufùndila;
 Ne kaamuci kònsò pa buloba kiikàle kasàlà,
 Ne muntu yònsò mwikàle mufùndi wa bu ne ki wèndè mudimu;
 Kufùnda dinanga dyà Nzambì wa muulu
 Mbifwànyine kukàmisha mbù;
 Anyì mukàndà muvùnga awu kawùvwakù mufwànyine kukùmbana byònsò to,
 Nànsha wòwò mwolola eku ne eku kwà dyulu.

69 Nwamònu dinanga dyà Nzambì's! Paanyimà pàà muntu mumanè kudishinda ne mukàngwile mwena lukuna ciibi ku budiswilè bwèndè, ne mubwelè mumunyangàkàje, ne mutèeke lufù munda mwèndè, nànsha nànkù Nzambì kàvwa ànu muswè bwà ewu kucimunyiibwayè to. Yèyè kutùuluka è kubangulula Yè byònsò. Úvwa ne cyà kwenzulula muntu awu.

70 Wàkatèeka Adàmà pa cipungidi kampànda ne: “Enzà cikampànda, kàdi cikansanga to; cikankènga, kàdi cikansanga to; kùlengi, kùkwàci, kùlabulu.”

71 Kàdi tudi tusangana ne, pàakabangululàYe, Wàkabanga ne—ne Abraham. Kàdi mu Abraham, Wàkabanga nèndè pa cipungidi cyà kaciyi cyà mushingà wà dyanza to. Kabìyi ne “wèwè muswè” to. “Ngènji. Nkààdi mwenzè. Nkààdi mukubènèshe, wèwè ne dimiinu dyèbè, ne bikwàbò, paanyimà pèèbè.” Cìvwa ncipungidi cyà kaciyi mushingà wà dyanza to. Wàkabanga ne Abraham, mudimu Wèndè wà byanza mwenzulula, kàdi mpindyewu ne

cipungidi Cyèndè cyà kaciyi cyà mushingà wà dyenza. Dìbà adi, patùdì tusangana ne, Yéyè wàkashindameena pa Abraham ne wàkamupèèsha cipungidi, kaciyi cyà mushingà wà dyenza to, ne mulayi.

⁷² Pashiishe kulwa Yè kùdì bankambwà, twètù kulwa pashiishe, mu Dipungila Dikùlukulu, patùdì twenda tupweka apu. Ki Yéyè ewu ùleeja patòòke cishimikidi cyà mudimu Wèndè. Mpindyewu twètù tudi ne Abraham, Izàkà, Yakòbò, Yòzefù; bankambwà bànaayi.

⁷³ Mpindyewu, Abraham ùvwa ùleeja mudimu wà diitabuuja, diitabuuja, bwalu Abraham ùvwa ndiitabuuja. Ùvwa ne diitabuuja dinène, bwalu: “Kààkatènkakanakù ku mulayi wa Nzambi, ku bupidyà to.” Pààbi, tudi bafwanyine kwamba ne: “mbimwèke bibi bipangè ne mwà kubìpa,” ne byònsò bimulwisha, yéyè kacya ànu wàkwàta kùdì Nzambi.

⁷⁴ Pashiishe tudi ne Izàkà, uvwa mwànà munanga, uvwa uleeja dinanga awu, bwalu, Abraham mwikàle cifwanyikijilu cyà Nzambi, mwàkalàmbudiibwà Izàkà amu, Genèsè 22, tudi tusangana ne wàkambula nkùnyi kubànda naayi pa kakùnà, ne byònsò bileeja cimfwànyi cyà Kilistò, bìdyanjila kuMuleeja mu cindidimbi. Ki dìbà adi cimpàngè cyà mùkòòkò aci kulwaci ne kulàmbùdiibwaci pa kaaba kèndè.

Mpindyewu aci cìvwa ndiitabuuja, dinanga.

⁷⁵ Ne *Yakòbò*, mbwena kwamba ne “munyèngi wa mwaba wà bendè,” nènku ki mudingyanganyi nyéyè awu. Ne tudi bamanyè ne bwà kwamba kwimpè nsòmbelu wa Yakòbò ùvwa ùleeja ngàsà, bwalu cìvwa nngàsà wa Nzambi, dìbà dyònsò, kùdì Yakòbò.

⁷⁶ Pashiishe kulwakù Yòzefù. Kakwèna cilumbù ne Yòzefù to. Yéyè nguvwa mupwàngàjiibwe awu. Mupròfetà wa Nzambi wàkapàtuka munkaci mwà bânà bààbò awu. Ne mukinyiibwe, kakuyi bwalu to, ne wàkasumbishiibwa. Ne mu mùshindù wònsò, nsòmbelu wèndè wàkaleeja mu cindidimbi nsòmbelu wa Yesù Kilistò. “Wàkalwa kùdì bàà Kwàbò, bàà Kwàbò kabààkaMwakidila to.” Ànu mùvwà Yòzefù mukinyiibwe kùdì bânà bààbò amu, mwediibwe mu dijimbà, bàcinka ne ùvwa mufwè; kupàtudiibwayè, kubàndishiibwayè ku dyàbalùme dyà Pàlò. Ne pàvwàye ùshiya nkwasa wa butùmbi, bàvwa bèèla mpungi, nudi bàmanya, cinù cyònsò cìvwa ne cyà kutwà panshi, kumpalà kwà Yòzefù.

⁷⁷ Tudi tusangana ne Yesù wàkasumbishiibwa ku mushinga wà wìpacila wùvwà Yòzefù musumbishiibwe awu. Mupàtùdiibwe mu—mu ciinà amu; ne wàkabànda mu Dyulu; mmusòmbe ku dyàbalùme dyà Nzambi. Ne pààlwàYe ùfùmina ku Mwaba awu, “Mpungi neàdilè, ne cinù cyònsò necitwe panshi, ne ludimi lwònsò nelùMujikùlè,” bupwàngàne’s.

Aci cìvwa diitabuuja, dinanga, ngàsà, ne bupwàngàne.

⁷⁸ Pashiishe mudimu wà mubidi kulwawù, wà disonga edi dinène dyà lupingù. Wàkenzela mudimu wà mubidi awu ku baprófetà. Baprófetà mbàvwà mudimu wà mubidi awu.

⁷⁹ Pashiishe ndekeelu wa byònsò kulwakù mutù wa mubidi munènè ewu, wùvwà Kilistò Yèyè mwinè. Baprófetà bònsò bàkaavwa badyànjlè kwamba Bwèndè. Mudimu wònsò wà cishimikidi wùkaavwa mudyànjlè kwamba Bwèndè. Kubangila ànu ku budimi bwà Edènà kwàka, kubangila ànu pa díbà mene dyàkabangàYe adi ne: “Nénteekè lukunà pankaci pàà dimiinu dyèbè ne dimiinu dyà nyòka” apu. Nènku tudi tusangana ne Wàkabangila kuntwaku, kubànda ne ku—ku bankambwà ne kubwela mu baprófetà, ne kupàtukamù. Musangu ewu kàbìdì Yèyè wàkamòna cimfwànyi Cyèndè Sungasunga, pààkalediibwà muntu umwèpele pa buloba, mupàtùke munda mwà mukàji, ùvwà m’Mudimu mwowela byanza wà Nzambì. Ùvwà m’Mwànà wa Nzambì, Yesù Kilistò. Kabingilà kàvwà kènza ne Àlediibwè, mbwalu Yèyè ùvwà ànu menemene Díyi.

⁸⁰ “Ku cibangidilu kwàkadi Díyi, ne Díyi dyàkadi ne Nzambì, ne Díyi dyàkadi Nzambì. Ne Díyi dyàkavwijiibwa mubidi ne dyàkasòmbela munkaci mwètù.”

⁸¹ Mpindyewu tudi tumòna mudimu mwowela byanza mupwàngàne mumwènèshìibwe mu Yèyè. Yèyè ùvwà mupwàngàne, ànu mùdì Nzambì, mu mùshindù wà ne Yèyè wàkamba ne: “Mémè nciyi ngenza byenzedi byà Taatù Wanyi to, kanùNgiitabùùji to. Nànsha Mémè... Kanwèna mwà kuNgiitabuuja anyi? Itàbùùjaayi byenzedi, bwalu byòbì mbìdì binùjaadikilà bwà ne, Mémè ndi Nganyi.” Mémè ntu munangè aci. Nwamònu anyi? Yèyè kwamba ne: “Panwìkalà kanùyì nuNgiitabuuja Mémè to. . .”

Bòbò ne: “Wèwè udi Muntu, uDivwija wa mwomùmwè ne Nzambì.”

⁸² KwambaYe ne: “Nwènù kanùyì mwà kungiitabuuja Mémè to, itàbùùjaayi byenzedi bìNdì ngènza. Ne Mémè nciyi ngènza byenzedi byà Ewu udi muNtùme to, díbà adi kanwèna ne bukenji bwà kuNgiitabuuja to.”

⁸³ Ki mùvwabi bikèngela kàbìdì bwà mwena Kilistò yònsò, leelù ewu, kwikalayè ne bujaadiki bùmwebùmwè abu. Mu Díyi dilaya dyà Nzambì edi, nsòmbelu yètù yòyi kayiyi yinwàngana ne yikùmbanangana ànu menemene ne cidì Díyi dyambè to, díbà adi katwèna ne bukenji bwà kudibìikila mutùdì beena Kilistò to patwìkalà katùyì balediibwe cyàkàbìdì. Yesù mmwambè, mu Maakò 16 ne: “Bimanyinu ebi *nebibilè* aba bàdì biitabuuja.” Nwamònu anyi? Kí nnè “bàdì mwà; bìvwà bikèngela bwà bòbò; pàmwàpa nebènzè” to. Nebàbyènzè. S’ki Musongi wa mpìngu utu mutwènzè awu. S’ki Èkèleeziyà wàkasongiibwa awu. S’ki—s’ki Mubidi wa Kilistò awu.

⁸⁴ Mpindyewu tudi tusangana ne cìvwa cìMuleeja mu mùshindù mupwàngàne. Musongi wà mpìngù mpindyewu ùvwa ne Dìyì dileejìibwe cyàkàbìdì mu Mudimu mwowela byanza ewu, wùbùikidiibwa ne m'Mwân'Èndè, Nzambì, Èmanùwèlè. Anjì elààyìbì ànu meeji, ne, muntu mudifile mu mùshindù wà ne Nzambì wàkaDimanyishila mwômò amu, mu mubidi awu, ne Yèyè wàkalwa . . . Yèyè ne Nzambì bààkalwa umwe. “Mémè ne Taatù Wanyì tudi Umwe. Taatù Wanyì mmusòmbèlè munda Mwànyì. Mémè ntu ngenza misangu yònsò ànu cidi cisànkishà Taatù.”

⁸⁵ Ambààyìbì tǔng bu mwena Kilistò leelù ewu mufwànyine kwikala ne bujaadiki bwà mùshindù awu? Wèwè's udi mufwànyine kwikala mudimu mwowela byanza mu Yuma mene emu, mu mùsèèsù. Wèwè ni udi mukàjì musukwidyanganyi wa bilàmbà paanyimà pàà mbaafù pambèlù pààpa, ikàlà wèwè ànu mudimu mwowela byanza wà Nzambì, paùdì mwà kwamba ne: “Ndi ngèza misangu yònsò ànu cidi cisànkishà Nzambì aci,” ne pàdì buloba bujima mwà kumòna mu—mudimu wà Yesù Kilistò wùdileejila mu wèwè amu.

⁸⁶ Byàkambiibwa, musangu kampànda, bwà ngòlò wa kale awu, kumpàlà kwà kwikalabò ne màshinyì àdì èngulula byamù awu. Kùdì . . . Bàvwa kale wàwa bàngata ngòlò bàmutuuta, mutuuci awu, ba-Indiens mu matùkù à kale pàcìvwa Arizona ewu ùcìbangilakù. Bàvwa bàtuuta ngòlò too ne pàvwa mutuuci awu ùmòna cimfwànyì cyèndè yèyè mwinè mu ngòlò awu. Bàvwa bàtuuta buumusha bunyingunyingu bwònsò bwà cyamù cifiike, bisòtà, manyaanù, bàbyùmushamù, too ne pàvwa mutuuci awu mwà kumòna cimfwànyì cyèndè yèyè mwinè byenzè bu mu lumwènù, ùtuuta ànu kutuuta.

⁸⁷ Mpindyewu, ki cidi Èvànjeeliyò wènza. Bantu bààbúngì kabàtu baswè kubàkudimunabò ne kubàtuutabò to. Èè, cidi cikèngela èkèleeziyà dilòòlò edi ndituuta dǐmpè, dyà cyena-kalè, dyà Nyumà Mwǐmpè, dyà dyùmusha maalu à pa buloba ne bintu byà pa buloba. Ki cidi cikèngelà Mpenta dilòòlò edi ncyòcì aci. Ki cidi cikèngela nkwaka yètù dilòòlò edi, ndituuta dǐmpè, dyà cyena-kalè, dikùdimuna dyà ngòlò, too ne pàdì maalu à pa buloba ònsò àpàtuka munda mwètù, ne Yesù Kilistò ùdileeja.

⁸⁸ Ngùikalèku mémè ànu ne dyanza dyà bantu edi mwab'ewu dilòòlò edi, batwìbwe musinga ànu menemene kùdì Kilistò, ne nsòmbelu yàbò milàmbula kùdì Kilistò. Ndi mwà kwenza byàbúngì ne dyanza edi, anyì Nzambì ùdì mwà kwenza byàbúngì, nànkà's wè, ne dyanza dyà bantu didì mwaba ewu edi, kutàmba binùdì bafwànyine kwenza ne Nsangilu mujimà wa Maèkèleeziyà wa Buloba bujimà, bwà Bukalenge bwà Nzambì. Muntu umwèpelè mudilàmbùle mu kabujimà mu byanza Byèndè, ki cyònsò cidi Nzambì naacì dijinga.

⁸⁹ Kàdi, nudi numòna's, twètù katwèna baswè kushààla

bapùwe tuMulekela ùtuuta *elu* luseke, *lwàlwa* luseke to, kutònkola *eci*, kutònkola *cyàcya*, kutònkola *ewu* mmwènenu, ne *wàwa nakà*, ne kulekela Yesù Kilistò udileejila mu twètù. Tudi tubandila sèndèma mipitèpìte búngì. Tudi ne ndongamu yà ntèlèviziyò mipitèpìte búngì. Tudi ne manàyi makwàbò à pa buloba mapitèpìte búngì, mu mùshindù wà ne èkèleeziyà ùkaadi musaapùlùke kùdi bantu. Mbwalu Nyumà Mwímpè ùdi ùpàtuka, ne cintu kampànda cikwàbò cibwela. Ncyà bushùwà's, nwènù balundà bàanyi.

⁹⁰ Ndi ngùm vwa majaaniki, à beena Mpenta bàà cyenakale, mùvwàbò bènza masangisha a milòmbò bufùkù bujimà. Baatatwètù ne baamamwètù, kùkaadi bidimu makùmi ànaayi, makùmi àtaanu, bàsambila bufùkù bujimà. Bantu bàvwa bàbàkìna, mu mùsèèsù. Kàdi twètù tudi tudyàm bídila, leelù ewu ne, bantu bònsò bóbò kabàyi bàtùtuuta byanza pa dikaaya to, mòna's, kùdi cintu cipampalàmùke mu twètù. "Dyàkabi dyènù pìikalà bantu bònsò bààkula bìmpè bwènù nwènù." Yèyè ùvwa mudyombola ne mubèngìibwe kùdi bantu, kàdi twètù's tudi cimfwànyì Cyèndè. Amen.

⁹¹ Cidì cìtùkèngelà leelù ewu mmasangisha kampànda à cyà bushùwà, mashùwashùwàlè à milòmbò, dikezudiibwa kampànda, kubangila ànu ku cyambilu too ne kùdi mulami wà ku ntempèlù, bikèngela nzùbu mujimà kukezudiibwayè, kùdi Nzambì, kutuuciibwayè, kuleejayè Cimfwànyì cyà Mutuuci, Èvànjeeliyò ùyiishiibwa mu bukolè bwà dibìikà dyà ku lufù dyà Kilistò. Ncyà bushùwà.

⁹² Ewu èvànjelìyò mukesè wa nsòmbelu mulenga utùdi nendè matùkù ònsò aa, ne kutuuta *ewu* nùnkù cyanza pa dikaaya, ne kuvwija *ewu* nùnkù mulami, ne *wàwa* nàka mukùlù, anyì cintu kampànda cikwàbò cyà mùshindù awu, byònsò bibidì ncidiidì. Ki aci menemene cyàkenzekà ku Nicée, ku Loomo anyì? Tudi baswè kuumuka ku bintu abi. Ba-Méthodistes, ba-Baptistes, ba-Presbytériens, beena Mpenta, ne bònsò, tudi ne cyà kupàtuka mu cyòci aci.

⁹³ Cidiidì kì ncyà mu Èkèleeziyà to. Bìdi bikèngela bwà Nyumà Mwímpè àkookeshè Èkèleeziyà, kàdi kì ndyela kampànda dyà tukàndà dyà cidìidì dyà ne nganyì udi kampànda. "Nzambì mmutèèke mu èkèleeziyà bàmwè bàpostòlò, bàmwè bapròfetà, ne bàmwè balongeshi, ne batangadiki, ne bampaasàtà." Nkì mbantu babàsungulemù ku dyela dyà tukàndà nànsha. Nzambì ngudi mubatèekemù, ku dibìikila dyà Nyumà Mwímpè, masangisha à milòmbò, ne ditentekelangana dyà byanza, ne dishàalà dyà kumpalà kwà Nzambì.

⁹⁴ Kàdi, leelù, tudi bavwijè ntèndeleeleu wetù mushààle wa nsòmbelu mulenga mu mùshindù wà ne bikaadi ànu bu cidìidì, byòbì biinè, mutùdi tucyènza mu màngumba ètù ònsò. Tudi... Muntu kèna mwà kufùnda mukwèndè to. Tudi bònsò

bapiile. Mwômò amu nudi nusanganamù ndambù wa balùme bashùwashùwàlè ne bakàji bashùwashùwàlè. Kàdi lutàtu, cìndi mêmè ngeela meeji, tudi tutàmba kushààla ku lu—ku luseke lwà banyààbanyà, bantu bashùwashùwàlè bàdi baswè kwitabuuja ne baswè bukolè bwà Nzambi. Kùdi bapitèpite búngi babwejiùbwe ànu ku cyenzi cyà nsòmbelu mulenga ne: “Èè, ewu’s mmuntu mwímpè. Mmuntu mulenga maalu.”

⁹⁵ Tudi ne èkèleeziyà mímpè. Tudi twibaka èkèleeziyà mímpè, ne èkèleeziyà mímpè kupìta yitùvwà naayi pa ciibidilu. Byònsò abi’s mbímpè. Katwènakù naabi cilumbù to. Mémè ntu muswè kumòna èkèleeziyà útanta.

⁹⁶ Kàdi, mwanèètù, mêmè ntu muswè kumumòna útanta mu bukolè bwà Mukalenge pamutù pàà kutancila mu bintu byà pa buloba. Alùkilaayi cyàkàbidì ku Èvànjeeliyò! Alùkilaayi ku bukolè bwà Nzambi! Alùkilaayi ku mpenta, ku . . . mùvwà wa ku cibangidilu amu. Kàdi, nudi numòna’s, lutàtù lùdi ne, katùtu baswè kwangata dituuciibwa adi to.

⁹⁷ Udi mwà kwamba cintu pa bìdi bitàngila cintu kampànda, ne cintu kampànda cyà nsòmbelu wa masandi cìdi èkèleeziyà wènza, anyi—anyi cintu kampànda cyà nsòmbelu mulenga, ànu pa dîbà adi bóbò bàmba bàkubènga, bàkànga biibi. Kwéna mwà kubwela to, nwamònu’s, bwalu bàdi benza cisangilu ne bàkukàngila biibi. Kabàcìyi bakuswè kàbidì to. Bàmba ne: “Udi mupàle. Udi mujimje lungenyi.” Kàdi bu mùdibi ànu ne ng’EMU MMÙDÌ MUKALENGÈ WÀMBA, cìdi muntu kanà yònsò ewu wàmba kacýèna ne bwalu kùndi mêmè nànsha. Bidi bikèngela bukolè bwà Kilistò bwà kushintulula muntu. Bìdi bikèngela bukolè bwà Kilistò bwà kulama muntu.

⁹⁸ Nèku ànu mwàkambà Yesù musangu kampànda ne: “Tàngilàayi bilòngò byà mbata. Kàdi Ndi ntwàmbila ne Solòmò, mu butùmbi bwèndè bwònsò, kààkavwàlakù bu cìmwè cyà ku byòyi to.” Solòmò, mu butùmbi bwèndè bwònsò, ùvwa muntu wa—wa mmwènekelu wa ùkòka ntèma. Kakùyi mpatà to. Yèyè uvwa cintu cinènè kùdi bàà pa buloba, ne muntu munène kumpàlà kwà Nzambi. Kàdi mùzàbì wà Solòmò kawùvwakù ne mwoyi munda mwàwù to. Cìvwa ncipese cyà cilàmbà, pàmwàpa cyenza ne myòsà myangacila pambidi pàà mùkòòkò. Kàdi, cilòngò cyà mbata cìvwa ne mwoyi.

⁹⁹ Cìdi cìtukèngela leelù ewu m’Mwoyi wà Kilistò munda mwètù. Aci ki cìdi cìkezulà; kì ncìdi mpambèlu, nshìngù wa nkoolù mukùdimuna, anyi dipòlomè dyà dimanya dyà bintu byà mu meeji, anyi cintu kampànda to. Bidi bikèngela bukolè bwà Kilistò mubiike ku lufù bwà kutùvwija cìvwà cìkèngela twètù kwikala aci. Nzambi kàtu ne ndongamu mukwàbò to pa kuumusha wa kulekela Nyumà Mwímpè ùlombola ne ùkòòkesha mu Èkèleeziyà.

¹⁰⁰ Kaa, Nzambì, Yèyè uvwa bikolè mu cimfwànyì cyà Nzambì, mu mùshindù wa ne Yèyè ne Nzambì bàakalwa Umwe. “Mémè ne Taatù Wanyì tudi Umwe.” Kaa, ekèlekèlè! Nnsòmbelu kaayi uvwaci, bwà Nzambì kusòmbelaYè munda Mwèndè, mu mùshindù wà ne mwoyi Wèndè wònsò wùvwa mujingila mu Nzambì. Kabyèna bikèmesha mùvwàci mudimu mwowela byanza to!

Sàtaanà wàkalwa kùdiYe.

¹⁰¹ Musangu wònsò wùvwa ànu Nzambì wèla meeji ne Úvwa ne mudimu mwowela byanza, Sàtaanà úvwa úbwelamu. Wàkabwelamu mu Mòsà, ne wàkashipa mikenji. Kàdi pàakalwàye kùdi ewu Mudimu mwowela byanza, aci civwa ndisungula dyà Nzambì yèyè mwinè. Amen. Ukaavwa—Ukaavwa mudyànjile kuMulongolola. Kacyàkamwenzela bwalu bwímpè nànsha bùmwe to. Yèyè wàkashààlè ne lulamatu kùdi Nzambì, pàakaMutàngilà Nzambì ne kumòna ne Wàkateeciibwa munda mwà matùkù makùmi ànaayi mu cipèèlè, bu Mòsà. Mu bushùwà bwà bwalu, bantu bònsò abu bàvwa bàMuleeja mu cindidimbì. Mikenji yìvwa yìshipiibwa. Kàdi pàakalwàye, Sàtaanà, mutècyanganyì munène awu, ne kuteetayè bwà kuMuteeta, wàkajandula ne uvwayè mupetè awu kàvwa m’Mòsà kuntwaku to. To, mukalenge. Wàkalengè ku nshinga wa volts binunu bitaanu yàkamwoshà mapwapwà èndè pàakatupikilàye Yèyè awu.

¹⁰² “Bàakafùnda ne,” mwàkambàYe. Nwamònu anyi? Adàmà wàkapòna. Kàdi, Yesù, Adàmà mwibìdi, Mudimu mowela byanza wàkalwà awu, bu Mupikudi, Wàkamba ne: “Bàakafùnda ne: ‘Muntu kàakwikala ne mwoyi ànu ku dyàmpà nkààyaadi to, kàdi ku Dîyi dyònsò dìdi dipàtukà mukana mwà Nzambì.’” Ki Yèyè awu ne Mudimu mwowela byanza. Èyowà’s, mukalenge. Kwambayè cintu kampànda cikwàbò. Yèyè ne: “Bàakafùnda kàbìdi ne: ‘Kuteeci Mukalenge Nzambì webè nànsha.’ Umùkà apa, Sàtaanà.” Ki Mudimu mwowela byanza ngawù. CyàkenzàYe ncinyi?

¹⁰³ Kì nkwamba ne: “Nèngàmbilè èkèleeziyà wanyì. Nèngàmbilè bakùlù bwà kwenzabò *cikampànda*. Mwèpiskòpò neènzè *cikansanga*” to.

¹⁰⁴ Yèyè wàkamba ne: “Bàakafùnda ne.” Paanyimà pààci ki pàkatèèkàYe Adàmà Wèndè wa kumpàla, kàdi kudishindayè, ki Sàtaanà kucinyangakajayè. Kàdi kàvwakù mwà kunyangakaja Ewu nùnkù to, civwàye mwenzè nànsha ciikàle cinyi. Mu mùshindù wà ne, too ne pàvwàye. . .

¹⁰⁵ Nzambì wàkamba ne: “Ewu m’Mwan’Àanyì munanga. Mutèèlèjaayi Yèyè. Bintu byònsò, Ndi m’Mupèèsha Yèyè byònsò. Nwènu, nuMutèèlèjaayi.” Bàvwa Umwe. Bàvwa umwèumwè Awu. Nzambì úvwa musòmbèlè munda Mwèndè, ùMuvwija Nzambì, Èmanùwèlè, pa buloba. Yèyè úvwa Mwànà wa mùkòòkò

mupwàngàne, kaa, Mudimu mwowela byanza mupwàngàne wà bupikudi. Byàkasànkisha Nzambi, dībà adi, ànu mùvwà Michel Ange amu, Yèyè ùvwà musonsòdībwe bikolè kùdi nsòmbelu Wendè. Tudi tusangana mu . . .

¹⁰⁶ Ndi ne Mifùndu mifùnda kaaba aka. Maakò 9.7, panwikalà baswè kucibala. Pàdi . . . M'Mukùnà wà Dikùdimuka dyà mpàla. PàvwàYe pa Mukùna wà Dikudimuka dyà mpàla, tudi tusangana ne kwàkamwènèka Mòsà, ne kwàkamwènèka Eliyà.

¹⁰⁷ Nènku pa dībà adi, katanci aka, mupostòlò Peetèlo kusonsodiibwayè bikolè, mu mùshindù wà wàmba ne: “Twìbakè ntentà yìsàtù kaaba aka. Netwènzèlè ànu malongolodi àsàtù ne cyòci eci. Netwènzè màngumba àsàtù: òmwè bwà Mòsà, òmwè bwà Eliyà, ne òmwè bwèbè Wèwè.”

¹⁰⁸ Pàcìcìvwàye àmu wàkula apu, dīyì kupàtukadi mu ditutu adi. Kwambadi ne: “Ewu m'Mwan'Àanyi munanga. Ndi musànkishìibwe bikolè Nendè, NèmMutuutè bwènù nwènù. Mutèlèjaayi Yèyè. Yèyè ngwìkala mwà kwakula.”

¹⁰⁹ “Wàkatàpiibwa mpùta bwà dishipa dyètù dyà mikenji. Wàkazaajiibwa bwà bubì bwètù.” Yèyè ùvwà Mwànà wa mùkòòkò, Mwànà wa mùkòòkò wà Nzambi, Mulàmbù mupwàngàne. Kacya kakùvwakù kwanji kwikala muntu nànsha umwe ne nsòmbelu bu Yèyè to, kacya kakùtukù kwanji kwikala muntu nànsha umwe paanyimà pende ne nsòmbelu bu Yèyè to. Yèyè nguvwa Mudimu mwowela byanza mupwàngàne, ùvwà mwakànàngàne ne Dīyì dyà Nzambi.

¹¹⁰ Nzambi ku cibangidilu wàkafila Dīyì Dyèndè, ndambù bwà eci citùpà cyà cikondo, bwà *cyàcyà* citùpà, bwà *cyàcyà* citùpà.

¹¹¹ Ki pòpò apu pàdi bantu baseeswishìibwe ne mu cibwejàkàjì cikolè leelù ewu. Badi bateeta bwà kwibakila pa cintu kampànda cyàkenzèkà kùkaadi bidimu makùmi ànaayi, makùmi àtaanu. Tudi . . . Cìvwà, cìvwà cìfidiibwe bwà cikondo aci.

¹¹² Bìvwà bifwànyine kwikala ne dikwàcisha kaayi kùdi Mòsà bwà kulwa ne—ne mukenji wà Henòka? Bìvwà bifwànyine kwikala ne dikwàcisha kaayi kùdi Mòsà bwà kulwa ne—ne mukenji wà Noa? Bìvwà bifwànyine kwikala ne dikwàcisha kaayi kùdi Yesù bwà kulwa ne—ne mukenji wà Mòsà? Nwamònu anyi? Ne bìvwà bifwànyine kwikala ne dikwàcisha kaayi kùdi Wesley bwà kulwa ne mukenji wà Luther? Bìvwà bifwànyine kwikala ne dikwàcisha kaayi kùdi Mpenta bwà kulwa ne mukenji wà Wesley? Nudi bumvwè cìndi muswè kwamba aci anyi?

¹¹³ Yònsò mmikòsa mwab'ewu mu Bible, ne bìdi bìkèngela bwà tùmànyè cikondo ne dībà, ne cidi bwètù twètù ncinyi. Ne pòpò apu ki patùdi tupangila leelù ewu. Tudi tubala bintu bikwàbò byònsò pa kuumusha Bible. Edi nditùkù didi dikèngelà bwà twètù kwikala ne mwoyi. Edi nditùkù didi Nzambi mututèkèle pànwapa. Tùtangilàayi mu Dīyì.

114 Mùshindù awu ki wùdibo bàpanga kumòna Yesù; Bàfaalèsà, ne Bàsadokà, beena Helòòde abu. Malongolodi mashiilèshiiilàngàne à mu ditùkù adi àvwa macimànyike mùshindù awu, ne macimànyikilemu ànu menemene, kakùvwa mùshindù wà kucipangila to, mùvwàbo bèela meeji. Kàdi pààkalwàYe, kakùyi mpatà to Ûvwa . . . Ûvwa mushiiilàngàne ne mùvwàbo bôbò bônso badyàmbidilaci. Ûvwa Muntu mukesè, mudipwekèshe mulediibwe mu cidiilù cyà nyama, mwikàle ne . . . bàmucinkila ne m’Mwânà mulela mu masandi, ne bintu byônso byà mùshindù awu abi.

115 Kàdi, nànsha nànkù, Yèyè wàkalwa menemene ànu mùvwa Mifundu myambè ne Yèyè nealwe amu. Nènku bàkaavwa biibidilangane ne civwa Mòsà mwàmbe, kàdi pèndè Mòsà mwakule Bwendè. Yèyè ne: “Èè, bu ne nuvwakù bamanyè Mòsà, nùnkù’s nudi bamManyè Mémè. Mòsà wàkaakula bwànyì Mémè.” Kàdi nànsha nànkù bôbò kabàvwakù ànu mwà kucimòna to. Babwelàkànàngane mu bilèlè byàbò, mu mùshindù wà kabàyikù mwà kucimòna to. Kàdi, nudi numòna’s, Yèyè kàakalwa bwà kuleeja malongolodi à ditùkù adi to. Yèyè kàakalwa bwà kuleeja ntèndeleeleu wa tusùmbù to.

116 Wàkalwa bwà kuleeja Taatù, ne Taatù ùvwa Dìyi. Amen. Mpindyewu ngàalu kuumvwa bwena Nzambi bwàmbwedi. Wàkalwa bwà kuleeja Dìyi dyà Taatù. Nzambi ùvwa mwambè ne Yèyè ùvwa mwà kwikalakù, nènku’s ki Yèyè awu pwàà, Mudimu mwowela byanza mupwàngànè wà ku mudimu munènè wà byanza wà Nzambi. Kaa, ekèlekèle! Yèyè ùvwa cimfwànyì Cyèndè cipwàngàne. Ûvwa ùleeja byônso bìvwà—bìvwà Nzambi mwambè. Ûvwa ùleeja civwà Adàmà mwambè Bwendè Yèyè aci. Ûvwa ùleeja civwà bapròfeta bônso bambè, civwà bankambwà bônso bambè. Byônso byàkambàYe, Yèyè ùvwa dyula dyà Dìyi. Bifwànyikijilu byônso byàkuula mu Yèyè. Èyowà. Wàkalwa Yèhowàh wa Dipungila Dipyadipyà. Yèyè ùvwa Yèhowàh wa Dipungila Dikùlukulu. “Dìyi musangu awu,” divwà mu Dikunji dyà Kapyà adi, “dyàkamwèneshiibwa ne dyàkasombela munkaci mwètù.” Yèhowàh wa Dipungila Dikùlukulu wàkalwa Yesù wa Dipungila Dipyadipyà. Yèyè ùvwa cimfwànyì cipwàngànè cyà Nzambi.

117 Kaa, bu Èkèleeziyà leelù ewu mwà kuleejakù ànu Èkèleeziyà wa kumpàla awu, pàakapwekà Nyumà Mwímpè mu Ditùkù dyà Mpenta apu! Bu mwena Kilistò leelù ewu mwà kuleeja’s wè! Twètù’s tudi musùmbà musopakaja, pa kufwanyikija ne civwàbò bôbò aci.

118 Mvwa mupicila, ngènda ndwa leelù ewu, mvwa mbandila, pâmvwà ndwa mwaba ewu apu, mpicila ku kàmwè kàà tu-Casa Grande twà tukesè etu, anyì yimwè yà ku myaba yà mikesè eyi, Mémè kumòna ne kùvwa bu—budimi bwà ndàndà, ne lutende lushiiilèshiiilàngàne. Bìvwa bikèngela kwikalabò ne moulin wà lupepèle kuntwaku, bwà kupwidija màyi, bwà

bikùnyìbwa abi kùtùngunukabi. Bwà cinyi? Kí ncyà kwòkù aku to. Nànsha kakesè. Kàdi, tàngilààyi ntulu wa kale awu, mvùla mmufwànyine kubènga kulòka bidimu bitaanu kàdi yéyè mmufwànyine kwikala ànu ne mwoyi. Kàdi wèwè mupangè kwelakù màyi munda mwà matùkù makesè, s'nebifwe. Nudi numòna's, kí mbyà ku muji to.

¹¹⁹ Mùshindù awu ki wutùdi twètù. Bikèngela kwikalabò bàtwèngeleka, ne bàtùvwija bantu banène mu èkèleeziyà, ne bàtùtuuta byanza pa makaaya, ne bàtubiikila ne *cikampànda*, *cikasnsanga*, anyi *cikankènga*.

¹²⁰ Èè, beena Kilistò bàà ku cibangidilu abu bàvwa bakàyàbàle. Kabàvwa bàcyùka ne nganyi uvwa ubàtuuta byanza paanyimà to. Bàvwa bàleeja Yesù Kilistò, bikolè menemene, mu mùshindù wà ne bàvwa bàmba. . . Bàvwa bàbàngata ne—ne bàvwa bapangi ne kabàyi balongè mukàndà to. Kabàvwa bayè mu cilongelu cibàndile to, ne kabàvwakù ne dipòlomè dyà ku cilongelu citùmbùke to. “Kàdi bààkamòna ne bààkadi ne Yesù.” Kí cidi cìbàkèngelà ncyòci aci, beena Kilistò leelù ewu, bwà kumòna ne nuvwa ne Yesù. Kùdi cintu kampànda pa bìdi bikutàngila, ciikàle cishìilàngàne. Ndi mumanyè ne aci kí. . . Aci ncintu cidi bantu kabàyi baswè to bwà kucyàmba, kàdi twètù katwèna tukèba dimanyika nànsha. Beena Kilistò bòbò kabèèna bènda bàkèbangana ne cintu kampànda cyà cipeepèle to.

¹²¹ Mwanèètù wa bakàji kampànda mukùlàkàji mu èkèleeziyà wanyi kùkaadi bidimu, ùvwa ne ciibidilu cyà kujuuka kwimba musambu ewu ne:

Bìdi bikèngela bwà kwalukilabò naanyi
kumbèlu ku Dyulu
Pa bulààlù bwà maalu mapeepèle bulengeja ne
bilòngò,
Pàdi bakwàbò balwangàne mvità bwà kupeta
difutu
Ne bapicile ne màtù mu mbù yà mashi anyi?
To, ndi ne cyà kulwangana mvità pìikalabi ne
ndi ne cyà kukòkèsha.

¹²² Anji elàbi meeji cyúvwàku mufwànyine kwenza bu ne uvwa mwaba ewu ne maalu ónsò miikàle àbèngangana ne Yesù Kilistò, bu ne uvwa ne mwoyi mu matùkù Èndè awu. Wèwè's udimù ne mwoyi's, mwanèètù wa balùme, mwanèètù wa bakàji. S'ncyà bushùwà. Yéyè's ùcidi ànu Dìyi. Tàngilààyi nùmòne mùdìbo bàDidyatakaja ku makàsà leelù ewu. Tàngilààyi mùdìbo bateeta kuDivwija bulongolodi, ne kuDisanga, ne byònsò byà mùshindù awu, ne maalu à pa buloba. Ikàlaayi biimànyine pambèlu. Angàtaayi—angàtaayi luseke lwà Yesù Kilistò ne Dìyi Dyèndè. Cintu nànsha cimwè kacipangishikù aci to. Shààlaayi nwènu ànu naaDi.

123 Byenzè mùvwà musukudi wa bilàmbà wa kale wa ba-Chinois, uvwa ne ciibidilu cyà kulwalwalwa mu Arizona ne mu Californie emu awu, kùkaadi bidimu. Kàvwa mwà kufùnda mwakù nànsha wùmwe wa mu Anglais to. Kàvwakù nànsha muyimanyè mene to. Paùdi umutwàdila bilàmbà byèbè byà disukula. Udi mumanyè civwàye wènza anyi? Ùvwa ne tupese tukesè twà mabèji, kapayi pafùnda kantu nànsha kàmwe to. Ùvwa ànu ùpanda kabèji aku ne ùkupèèsha kapesè kàmwe. Paùdi walukila, bivwa bikèngela bwà kapesè kàà dibèji aku kàkumbananganè ne kèndè kapesè kàà dibèji, cyanààna kùvwa wangata bilàmbà byèbè bisukula abi to. Abi's mbitàmbe bwimpè. Udi mufwànyine kutentula dìnà, kàdi kwàkumukùtakajakù yèyè ku aci to, bwalu bivwa bikèngela bwà kapesè kàà dibèji aku kàkumbananganè menemene ne kèndè kapesè kàà dibèji aku.

124 Mùshindù awu ki wàkenzà pèndè Nzambi cipungidi Cyèndè. Kabyèna bikèngela bwà dilabula dyètù dikumbananganè ne twitabàayi kampànda, dîyi diswika kampànda, dingumba kampànda dyà èkèleeziyà to, kàdi didi ne cyà kukumbananganè ne Dîyi dyà Nzambi, Yesù Kilistò. Cyà bushùwà. Patùdi tulwa kùdi Kilistò, dîbà adi Kilistò ùdi ùtunana. WàkaMupandulula mu bipese bibìdi, ku Kàlvariyo. Cipese cyàci Yèyè wàkacibàndisha, bwà kusòmbaci ku cyanza Cyèndè cyà dyàbalùme, civwà mubidi aci. Nyumà, Yèyè wàkalwa, mmwalùjibwe pànwapa bwà kuMwenzela Mukàji-musèla. Ne bikèngela bwà dilabula dimwèdimwè divwà mu Kilistò adi diikalè munda mwètù.

125 Kakùyi mpatà to Yèyè ùvwa—Yèyè ùvwa mupwàngàne mu mùshindù wà ne Wàkasànkisha Musongi wà mpingù awu, ne kuMusonsola bikolè mu mùshindù wa ne Yèyè wàkaMutuuta ku Kàlvariyo. Kaa, ekèlekèle! Mpindyewu tudi tuMumòna mùdi Mufùndu mwambè, mudimu mwowela byanza wà Nzambi. “Tudi tuMumòna mutuuciibwe, mutàpiibwe, ne munyongàmijibwe kùdi Nzambi.” Ki mudimu mwowela byanza mulelèla ngwòwò awu. Ànu mwàkatuutà 'Ange wèndè amu's, ki cyàkenzà ne . . .

126 Bu ne Yèyè ùvwa ànu ne nsòmbelu mwimpè cyanààna, nùnkù Ùvwa mwà kwikala ànu bu bàmwe bàà ku bantu bàdi bàyiishà èvànjeeliyò wa nsòmbelu mulenga leelù ewu aba ne: “Yèyè ùvwa mupròfetà.” Ùvwa mupròfetà bushùwà, kàdi Ùvwa mutàmbe ne mupròfetà. Ùvwa Nzambi. Ùvwa Èmanùwèlè.

127 Nènku mpindyewu cyàkaMwenzà ànu menemene, bwànyì mèmè, Mudimu mwo—mwowela byanza bwànyì mèmè ne bwèbè wèwè, mbwalu Nzambi wàkaMutuuta. WàkaMutuuta ku Kàlvariyo. Bu ne Yèyè kààkatuuciibwa to. . . Nànsha byòbì ne Wàkabiisha bafwè búngì kaayi, nànsha Yèyè muyiishè bintu binène munyi, nànsha nsòmbelu Wèndè mwikàle munène bishi, nànsha Yèyè mulàke mukana bishi, Yèyè's wàkajaadikiibwa

mwaba awu. Wàkasankishiibwa, Nzambi's, mu mùshindù wà ne Yèyè ùvwa Muntu umwèpelè uvwakù mwimàne pa buloba uvwakù Nzambi mufwànyine kutuuta bwà bakwàbò bwònsò. Mupwàngàne Awu wàkatuuciibwa bwà bàvwa kabàyi bapwàngàne. Bufùki bwònsò nkòong bwàkadishinda abu, ku Adàmà, bwàkapikudiibwa mu Yesù Kilstò. Mudimu mwowela byanza wà Nzambi wàkatàmba diteeta bukolè. Mmunyì mwàkacyènzàYe? Ku Dìyì. “Bààkafùnda ne: ‘Muntu kààkwikala ne mwoyi ànu ku dyàmpà nkààyaadi to, kàdi ku Dìyì dyònsò didi dípàtukà mukana mwà Nzambi.’”

¹²⁸ Kaa, wèwè mulundà wanyì mwena Kilstò, vwàla byà mvità byònsò byà Nzambi. Kwikadi wàlukila cyànyimà ne kaammwènu kakesè kàà twitabààyi kampànda, anyì cintu kampànda cyùdi utwà nyama ku mikòlò aci to. Vwàla byà mvità byònsò byà Nzambi paùdi uya bwà kulwangana ne mwena lukunà, mwàkenzà Mukalenge wetù amu. Yèyè wàkaleeja mùdi mwena Kilstò wa mutàmbe kwikala mutekète tèkètèè mwà kucimuna Sàtaanà ànu ne Dìyì nkààyaadi. Yèyè ùvwa ne makolè, Ùvwa mwà kwikala mutuutè Sàtaanà mu mùshindù kanà wònsò wùvwàYe muswè awu, kàdi Yèyè kààkakwàta naawù mudimu to. Wàkangata ànu Dìyì ne kumucimuna naaDì. “Bààkafùnda ne. Bààkafùnda ne.” Myaba yònsò ne: “Bààkafùnda ne.” Pa nàнку Yèyè kucimuna Sàtaanà ku Dìyì dyà Nzambi.

¹²⁹ Mpindyewu, awu nguvwà Mudimu mwowela byanza mupwàngàne ne Nzambi wàkaWùtuuta. Cìvwa ncileejilu kaayipu's wè! Cintu cilelèlà kaayipu's wè! Nwamba bwà kapese kàà—kàà lupìngù lwà Michel Ange kuntu kwàka, lwà Mòsà lwàkatuuciibwà pa mukòlò alu anyì? Bible mmwambè ne: “Muntu ewu wàkayangakajiibwa kumutù kwà bantu bònsò. Wàkanyangakajiibwa bikolè mu mùshindù wà ne Kàvwàkù nànsha mumwèneka bu mwànà wa muntu to. Wàkatuuciibwa. Wàkazaajiibwa. Ùvwa ùzònzà mashi. Wàkatàpiibwa.” Yèyè... Cyònsò cìvwa cìfwànyine kwenjùibwa. Yèyè wàkamwèka ànu bu—ànu bu mushiki munène wà Mashi ne mifuba, byènda pàmwè. Kàvwa nànsha mene ùmweka bu muntu wètù ewu to, pàvwaYe wenda ùcikòka ùbànda naaci ku Kàlvaryò apu. Nzambi wàkaMutuuta bwètù twètù. Ki cidi cìMuvwijà Mudimu mwowela byanza mupwàngàne ncyòci aci.

¹³⁰ Kaa, mùshindù mwinè wùndi muMunangè's wè, pa kumanya ne Yèyè mmungenzèle cyòci aci, pa kumanya ne Yèyè mmukwenzele cyòci aci. Mmunyì mutùdiku mwà—mmunyì mutùvwàku bafwànyine kukùmbànangana naaci? Muntu nànsha umwe kí mmufwànyìnekù kukùmbànangana naaci to. Muntu nànsha umwe kí mmukùmbàne mwà kukùmbànangana naaci to. Tuvwa pànwapa katùyì ditèkemena to. Twètù katùvwa ne Nzambi to. Twètù katùvwa ne mùshindù nànsha wùmwè wà bupikudi to. Yònsò wa kutùdi mulela ku disangila dyà mulùmè ne mukàji, ne bivwa bikèngela ànu bwà twètù kufuta

mushinga awu. Kàdi Yèyè kulwa, mupwàngàne Awu, ne ùvwa mupwàngàne ne ùsànkisha mu mùshindù wà ne Nzambi wàkaMutuuta bwèbè wèwè ne bwànyì mèmè.

¹³¹ Mpindyewu, munda mwà bidimu bitwè ku binunu bìbìdì, Nzambi ùdi ùteeta kuMusongela Mukàjì-musèla mudimu mwowela byanza, ùdibò bàbìikila ne ng'Èkèleeziyà. Ncyà bushùwà. Nzambi ùdi ùcyènza bishi? Ùdi ùcyènza ku ngenzèlù Wendè utu kàyì ùshintulukaku awu, Díyì. Nzambi kàtu ùshintulukà ngenzèlù Wendè to. Muntu kanà yònsò ewu, wèwè ùdi mwà kushintuluka. Udi ushintuluka. Mèmè ndi nshintuluka. Cikondo cidi cishintuluka. Buloba bùdi bùshintuluka. Kàdi Nzambi kàtu ùshintuluka to, Yèyè mmupwàngàne. Yèyè kàtu ùshintuluka to. Ne mùshindù wùdiYe wènza cintu kampànda musangu wà kumpàla, Ùdi ùcyènza musangu wònsò ànu mùshindù wùmweùmwe awu.

¹³² Wàkasùngila muntu musangu kampànda bwalu muntu wàkanyingalala. Mùshindù awu ki wàsùngilàye muntu cyàkàbìdì. Wàkondopa muntu kampànda bwalu ùvwa ne diitabuuja. Ne Òndopè wàlonda awu mwimànyìne pa cishìmikidi cimwècimwè aci. Yèyè kàtu ùshintulukà mùshindù Wendè to, bwalu, nwamònu's, Yèyè mmudishikàmine ne Yèyè ngwa Cyendèlèlè. Kàtu ne mikàlù to, ùdi myaba yònsò, mmumanyi wa byònsò. Yèyè ùdi Nzambi. Nènku ki bwà cinyi kabyèna bikèngela bwà kulòmbaYe muntu nànsha umwe lungènyi to. Kabyèna bikèngela bwà kwindilaYe too ne pàdiYe ùyiila byàbùngì to. Kèna dijinga ne dipòlomè dipyadipyà to. Yèyè mmupwàngàne. Nènku cipidì nì ncyà bishi, ne cintu nì ncyà bishi cidiYe wènza musangu wà kumpàla aci, dipàngadika Dyèndè dyà kumpàla didi dishàala dimwèdimwè adi bwà kashidi. Kadyèna mwà kushintuludiibwakù to. Kaa, mùshindù mwinè wùndì ne disànka's wè!

¹³³ Nènku pààkenzàYe mudimu Wendè mwowela byanza wà kumpàla awu, Wàkamutèeka paanyimà pàà Díyì. PààkenzàYe Mudimu Wendè mwowela byanza mwibidì, Yèyè awu ùvwa Díyì. Amen. Ùvwa Díyì; kàyì *paanyimà* pàà Díyì to. Kàdi, Yèyè ùvwa Díyì. Nzambi kàtu ùshintulukà ndongamu Wendè to. Ki cyòci aci menemene cyàkabangàYe bwà kwenza naaci èkèleeziyà Wendè wa kumpàla, Díyì.

¹³⁴ Mpindyewu, Nzambi, Díyì, ku cibangidilu, Ùvwa mudikàdile kùdi bakwàbò bònsò, bintu bikwàbò byònsò, bantu bakwàbò bònsò. Mpindyewu, ncyèna ne meeji à kwamba cyòci eci bwà kupangakana to. Nzambi mmusungulujanganyi. Nutukù bamanyè nàнку anyi? Nudi nwakula bwà dibwelakaja dyà bantu? Nzambi's ki musungulujanganyi. S'ncyà bushùwà ne Yèyè ùtu ùsungulujangana. Udi utàpulula cisàmbà Cyèndè ne bàà pa buloba. Wàkatàpulula Izàlèlèlè, ditunga Dyèndè. Udi ùteeta kutàpulula èkèleeziyà Wendè ne bàà pa buloba, kàdi èkèleeziyà mmuswè kutungunuka ne bàà pa buloba. Kàdi

cisàmbà Cyèndè cidi ànu cisungùlùjùibwe, cisungùlùjùibwe kùdiYe. Yèyè ùdi Nganyi? Dìyi.

¹³⁵ Mmunyi mùdiku muntu mwà kwikala ne dibàtiiza dyà Nyumà Mwímpè, ne Nyumà Mwímpè ngudi mufunde Dìyi, kàdi muntu kwikala ne dibàtiiza dyà Nyumà Mwímpè kàdi kuvila Dìyi adi? Mmunyi mùdiku Nyumà Mwímpè munda mwèbè mwà kuvila Dìyi Dyèndè Sungasunga dyàkafidiibwà bwèbè wèwè? Ncyèna mwà kucyùmvwakù to. Bikèngela cìpetanganè ne Dìyi. Ne nyumà wèbè udi munda mwèbè awu kàyi muswè kutwà “amen,” ku mulayi ne mulayi wònsò wà Nzambì kùdi cintu kampànda cipampàlamùke.

¹³⁶ Mwanèètù Fred Sothmann anyi muntu kampànda kaaba aka dilòlò edi, ùvwa mutèlèlè ne: “Yesù Kilistò umwèumwè awu makèlèlèlè, leelù, too ne kashidi.” Yèyè ùdi Dìyi. Aci, cyà bushùwà. Yèyè ùdi misangu yònsò ànu umwèumwè awu, nwamònu’s, ne bikèngela bwà nyumà wèbè àtwe “amen” ku cyòci aci.

¹³⁷ “Kaa, Yèyè, mu mùshindù kampànda Yèyè ùdi nànkù.” Mu mùshindù wònsò, Yèyè ùdi umwèumwè awu makèlèlèlè, leelù, too ne kashidi.

¹³⁸ Mpindyewu tudi tumòna ne Nzambì wàkabanga kuDyènzela Mu—Mukàji-musela bwà Kilistò. Pa nànkù...Ne Mukàji-musela awu ùdi ne cyà kufwànyikijiiibwa Nèndè ne munda Mwèndè, bwalu ncitùpà cyà ku Yèyè. Mpindyewu, Mukàji-musela ùdi citùpà cyà ku Yèyè. Ùdi citùpà cyà ku Yèyè. Dìyi bwà ditùkù adi, Mukàji-musela ùdi ùlwa citùpà cyà ku Dìyi adi, bwalu n’Kilistò. Mpindyewu, nudi nwitabuujà nànkù anyi? Bikèngela twikalè mu Kilistò. Mu Kilistò, bikèngela twikalè bàà Kilistò, mu Kilistò, citùpà cyà ku Kilistò.

¹³⁹ Mukàji ncinyi, pàdiye wàngata mulùme, anyi mulùme pàdiye wàngata mukàji? Bìdi bikèngela bwà mukàji awu ikalè citùpà cyà ku yèyè. Kabàcyèna kàbìdì bàbìdì to. Bàdi umwe.

¹⁴⁰ Nènku pàakashààla Nzambì ne Kilistò umwe, Bàvwa Umwe. Bwalu, Nzambì ùvwa Dìyi, ne Dìyi dyàkavwijiiibwa mubidi. Mubidi ne Dìyi byàkalwa Umwe. Nènku pàdi èkèleeziyà ùlwa Mukàji-musèla wa Kilistò, Yèyè ne maÈvànjeeliyò bìdi cintu cìmwè.

¹⁴¹ Mmunyi mùdi mwà kwamba, dìbà adi ne: “Matùkù à bishimà àkaadi mamanè kupita”? Mmunyi mùdiku mwà kwamba, dìbà adi ne: “Yèyè kèna umwèumwè awu makèlèlèlè, leelù, too ne kashidi”? Mmunyi mùdiku mwà kwamba ne: “Bintu abi bìdi bwà mùpostòlò anyi bwà muyiidi kampànda, anyi muntu kampànda mu ditùkù dikwàbò,” pèèbè mwikàle citùpà cyà ku Yèyè?

¹⁴² Pààbi’s, Yèyè wàkamba ne: “Maulu ne buloba nebìjiminè, kàdi Dìyi Dyànyì kadyàkupangilakù to.” Kàdi bìshi bwà Bwàkabuulwibwà 22, pàakajikijàYe kufùnda Mukànda awu apu? Wàkamba ne: “Ndi njaadika ne muntu yèyè ànu musàkidile

dîyi dimwèpele, anyi muumùshileKù Dîyi dimwèpelè, cyèndè citùpà necyùmushiiibwè ku Mukàndà wà Mwoyi.”

143 Mmuni mutwikalàku mwà kufika mu Dyulu, dîbà adi, bwà kwamba ne: “Èè, mèmè ndi ngiitabuuja *cikampànda*, kàdi ncyèna ngiitabuuja Aci to”? S’bidi bikèngela bwà wikalè Dîyi mu kaabujimà, bwalu udi citùpà cyà ku Yèyè. Ki mùdi Nzambi ùteeta kwenza Èkèleeziyà Wendè leelù ewu, kí nku twitabàayi kampànda to. Kàdi bóbò bàdi bàteeta bwà kutubweja ku bukolé mu cyòci aci, balùmyànà wa yààya. S’nudi mwà kucimòna cilwa. Mufùndù wùdi ku cimanu. Kabyàkunèngakù to katùyi bashàale Èkèleeziyà wa buloba bujimà. Nènu èkèleeziyà ne èkèleeziyà yònsò neikalè ne cyà kakùluka ànu mu cyòci aci, Bwà cyanàànà neàtwalè maalu ikalà mwà kwenzeka awu. Èè, nudi badilongòlòle bwà kuàtwàla anyi? Bivwa bitàmbe bwimpè nwènu kubènga kucyènza ànu ne bwalu nudi nwela meeji ne ncintu cimpè.

144 Bivwa bitàmbe bwimpè bu wèwè mwà kwikala ne Kilistò munda mwèbè, bwalu Dîyi adi ndyà Cyèndèlèlè, ne Dîyi adi ki dyakubiishà ku lufù. Udi ulwa citùpà cyà ku Dîyi adi. Udi mufwànyikijiiibwe ne Dîyi.

Leelù ewu, udi wamba ne: “Mèmè ndi mwena Kilistò.”

145 “Udi wa mu dngumba kaayi?” Èè, aci kacyèna ne bwalu nànsha bùmwe ne bwena Kilistò to.

146 Bidi ànu bimpè bwà kwikala ne màngumba. Ncyèna naaci cilumbù to. Kàdi, nwamònu’s, aci, ki cidì bantu. . . Bantu bààbùngi bàtu bàmba ne mèmè ndi mpanakaja màngumba, ngàtwa misèbà. Kí ncìndi ngenza to. To, mukalenge. Màngumba awu, s’adi ànu bimpè. Aci cidì ànu mùdi mèyi à dyumvwangana bwà mudimu, anyi cintu kanà cyònsò cyà bwena aci. Kàdi paùdi ulamata, bwalu udi wamba ne: “Mèmè ndi mwena Kilistò bwalu ntu wa mu èkèleeziyà *kampànda*,” aci kacyèna ne cidici cyùmvwija to. Bidi bikèngela wikalè wa Kilistò, ne Kilistò n’Dîyi. Ne misangu yàbùngi màngumba awu atu kule ne Dîyi ànu mùdi Esètè kule ne Wesètè emu.

147 Bikèngela ùshaalè ne Dîyi adi, bwà kwikala Mukàji-musèla. Pawikalà mu Mukàji-musèla, udi mu Dîyi, ne Dîyi didi munda mwèbè. Ne Dîyi divwà dileejè Nzambi munda mwà Kilistò adi, didi dileeja Nzambi umwèumwè awu munda mwèbè. Amen. *Amen* mbwena kwamba ne “biikalè nànkù.” Pa nànkù, biikalè nànkù. Mèmè ndi ngiitabuuja ne m’Bulelèlè. Bikèngela ùfwanyikijiiibwè Nèndè.

148 Mpindyewu, byòbi bikèngela bwà mèmè kwikala mwena Àmèrikè mulelèlè ne mushùwashùwàlè, byòbi bikèngela bwà mèmè kwikala mwena mwàbò mulelèlè wa ditungà edi, Bikèngela ngiikalè mufwànyikijiiibwe naadi. Bikèngela ngiikalè cyònsò civwàdikù aci, cimpè anyi cibi. Bikèngela ngiikalè cyònsò cididi, cimpè anyi cibi; cyònsò ciikalàdi aci, cimpè anyi cibi.

Bikèngela ngiikalè mufwànyikijìbwe ne ditùngà edi, byòbì bikèngela bwà ngiikalè mwena Àmèrikè. Mmwómò anyi? Mu butùmbi bwèndè anyi mu bundù bwèndè, mu budiikadidi anyi mu kapyà, cyònsò cidìye aci, ndi ne cyà kwikala mwenji wa dibènga-kufwà dyèndè. Ndi ne cyà kwimana bu cimùku. Cyònsò cidìye aci, ki cìndì. Cyònsò civwàye aci, ki cìndì. Cyònsò ciikalàye aci, ndi ne cyà kwikala mwabanyanganyi nendè. Ncyà bushùwà.

¹⁴⁹ Anji elàayi meeji pa bwalu abu bwà katanci kakesè. Dìbà adi, bwà kwikala cyòci aci, bu mwena Àmèrikè... Nènnùfikishilèci, bwà nwènu kwikala batwishìbwe bwà kucimòna, pànkaadi njikija apa.

¹⁵⁰ Bwà kwikala mwena Àmèrikè, bikèngela ngiikalè mufwànyikijìbwe ne cyònsò cikaadiyekù mwenzè aci. Dìbà adi, ngàkiimana pa Lubwebwe lwà Plymouth apu, pàmwè ne-pàmwè ne bankambwà abu. Mvwa nsanganyibwa ku Lubwebwe lwà Plymouth alu ne beena Lwendu abu. Mvwa naabò kuntwaku. Ngàkabànda pa kabalù pàmwè ne Paul Revere, bufùku kampànda, bwà kudìmwija ditùngà edi ku njìwù yàdi. Bìywa bikèngela bwà mèmè kwikala nàнку, bu ne mvwa mwena Àmèrikè.

Wèwè udi wamba ne: “Kaa, Mwanèètù Branham!”

¹⁵¹ Indilà kakesè. Bible mmwambè, mu Ebèlù nshapità wa 7, ne: “Lewì wàkapeta byàdiikùmi awu, wàkafuta byàdiikùmi, bwalu ùvwa mu mifungu yà Abraham pàakatwilanganàye ne Melekisedekè apu,” tatwèndè wa tawèndè wa tatwèndè, ne bàakamubadilaci. Pàvwà mwànà wa mwànà wa mwikùlwèndè mulùme mu mifungu yèndè, pàakafutà Abraham byàdiikùmi kùdi Melekisedekè apu, Nzambi wàkacyàbanya. NcyàkenzàYe anyi? Ncyà bushùwà.

¹⁵² Cyònsò cidi ditùnga edi aci, ki cìndì. Ncyà bushùwà. Pa nàнку, ngàkiimana pa Lubwebwe lwà Plymouth alu. Ngàkabànda pa kabalù pàmwè ne Paul Revere.

¹⁵³ Ngàkasabukila mu cibandabanda cyà Valley Forge, mvwa pa musulù wùvwà mukwàte dibwe dyà mashika awu pàmwè ne George Washington. Mvwa umwe wa ku bàsàlaayi bàà beena Àmèrikè bàvwà kabàyi ne bisàbaatà ku makàsà abu, bwà kakùngamangana ne ba-Britanniques. Mvwa ne makàsà makwàte mashika mu dindà adi, pangàakàjingilà bilàmbà ku makàsà apu. Ngàkàmòna Washington ùpàtuka mu cipèlè, mubolè bolebole, too ne mu cimòno, ùfùmina ku disambila bufùkù bujimà. Mvwapù pàakenzekàci apu.

¹⁵⁴ Ngàkiimana pàmwè ne Stonewall Jackson, pàakavulà dikàndameena apu. Pàakatùmà bilwilu byà ku nord abi mukenji, bôbò kwamba ne: “Bilwilu byònsò byàshìikidi.”

Awu ne: “Jackson ùdi penyì?”

155 Bòbò ne: “Mmwimàne bu cimanu cyà mabwe.” Mvwa mwimàne pàmwè nendè kuntwaku; kakwàcikwètù, kanyìikanyì wa mùncyonci, kàà mèsù à bleu aku.

156 Bààkamukonka musangu kampànda ne: “Mmunyì mùdiku mwà kushààla kacya wìmana pàdì dikàndameena dinène mùshindù awu?”

157 Muntu mutàmbe kupwekela awu, kutuutayè cisàbaatà cyèndè cyà mbuma aci pànshì, mùshindù *ewu*, kwambayè ne: “Mémè ncyèna ngeelakù màyi à kunwà mukana mwànyì emu, pàndì ncyì musàkidila Nzambì wa Bukolè bwònsò to.” Ngàkiimane nendè mu bìvwàyè wìtabuuja ne ki mùdìbi abi. Ngàkiimana pàmwè ne Stonewall Jackson. Ncyà bushùwà.

158 Mvwa ku Dimànshà dyà Cyayi dyà ku Boston adi. Ngàkambulwisha bwà kwimansha cìmwè cyà ku Cyayi cyà ba-Britaniqués aci mu mbù. Bìvwà bìkèngela mémè kwikala nànkù, bwà kwikala mwena Àmèrikè. Èyowà's, mukalenge. Èyowà's, mukalenge. Ngàkatwà cyàlà pa Dìyi dyà Budishikaminyi, pàmwè ne Thomas Jefferson. Ngàkeela Ngonga wa Budiikadidi, mu dyà matùkù à4 à ngondo wa mwandamutekète, wa cidimu cyà 1776.

159 Ndi mufwànyìkijìibwe mu bundù bwèndè bwà ditomboka, pàvwa muntu ùlwangana ne mwanààbù, ne taatù ùlwangana ne mwanèndè mulela. Bìkèngela ngiikalè mufwànyìkijìibwe mu bundù bwèndè, byà mwomùmwè ànu mùndì mufwànyìkijìibwe mu butùmbì bwèndè amu. Ncyà bushùwà menemene.

160 Mvwa ku Wake Island pààkafwà bàsàlaayi bònsò apu. Ngàkabàmòna bàfwa. Ngàkabàmòna pàakakwàtábo Wake Island apu. Ngàkambulwisha ku dibàndisha dyà dibèndelà mu Guam. Ncyà bushùwà menemene.

161 Cyònsò cìvwàyè, ne cyònsò cikàadiyekù mwenzè, cyònsò cìdiye mpindyewu aci, ndi ngàmba ne maleela ònsò ne mémè ndi citùpà cyà ku yèyè, bwalu ndi ne disànka dyà kwikala mwena Àmèrikè. Kàdi wèwè?

162 Bwà kwikala mwena Kilistò, ndi ne cyà kwikala mùmwèmùmwè amu. Àlèluuyàh! Èyowà's, mukalenge. Pìikalàbi ne ndi mwena Kilistò, dìbà adi's ngàkayiisha Èvànjeeliyò ne kudìmwija bantu bwà manyooka àvwà àlwa, pàmwè ne Noà. Èyowà's, mukalenge. Mvwa citùpà cyà cyòci aci, mwómò amu. Mvwa citùpà cyà ku cibùcìlu cyà Nzambì.

163 Mvwa pàmwè ne Mòsà ku cipuka cìvwà cilàkukà kapyà aku. Ngàkiipaciibwa mu Ejiipitù pàmwè ne Mòsà. Ngàkanyeema bimpàmbara mu cipèèla amu, ne mvwa nendè ku cipuka cìvwà cilàkukà kapyà aku. Ngàkuumvwa dìyi Dyèndè. Ngàkamòna butùmbì Bwèndè. Ngàkamòna Dikunji dyà Kapyà mu kaacipuka mwàmwa, diyìkilangana ne Mòsà.

164 Mvwa nendè ku Mbû Mukunze pàakakàngukàye apu. Ngàkamòna Dikunji dyà Kapyà dishikama pa Mukunà wà Sinààyi. Ngàkadyà manà mu cipèèlà ne kunwà mâyi ku lubwebwe lutuuta alu. Àlèluuyàh! (Ncyèna ndyùmvwa bu udi ne bidimu makùmi àtaanu ne bitaanu mpindyewu mene to.) Amen. Èyowà's, mukalenge. Ngàkadyà manà mu cipèèlà, pàmwè ne bânà bàà beena Ebèlù mu cipèèlà mwàmwà. Ne ngàkanwà mâyi ku lubwebwe lutuuta lùmwèlùmwe alu.

165 Ngàkiimana ne Yoshùwa mu dindà adi pàvwàye wènda ùkenketa bimanu byà Yelèkò, ne kumònayè Muntu mwimàne apu. Kupàtulayè mwelè wèndè wa mvità awu mu cimànga ne kuyayè lubilu bwà kutwilangana Nendè. Kwambaye ne: “Wèwè ewu udi bwètù twètù anyi. Udi ne mwena lukunà wetù anyi?”

166 Awu ne: “Mémè ki Kàpíteenà kàà cilwilu cyà Mukalenge.” Ngàkamòna Yoshùwà wèla mwelè wèndè wà mvità awu panshi. Ngàkatwà binù panshi pàmwè ne Yoshùwà pàngààkiinamà panshi kumpàlà Kwèndè, Kàpíteena kàà Mukalenge kàà cilwilu Cyèndè. Ngàkamòna bimanu byà Yelèkò byùpuka, ku mwadi wà mpungi.

167 Ngàkamòna Yoshùwà, wàmba ne: “Wèwè díbà, imànakàna kaaba kàmwè. Ne, wèwè ngondo, imàna pa Ajàlònà. Kùnyungukù to.” Ngàkamòna díbà diimana tèndé, kàdi ngondo yèyè kàyikù ùpangila bwà kufila bukènkè bwèndè to. Ngàkamòna byònsò abi byènzeka.

168 Mvwa ne Danyèlè mu bwinà bwà ntambwe; mvwa ne bânà bàà beena Ebèlù abu mu cikùtù cyà kapyà.

169 Mvwa ne Eliyà, kuntwaku pàakamubèngà buloba bujima apu, ne Aakàbà ne ba-Izàbèlè bààbò bònsò abu ne nsukì yàbò mibebula ne bintu byà ditùkù adi, bilaabu byàbò byà kwìsù ne mpùùtùlù, byònsò byàkàkwàtá èkèleeziyà abi. Ngàkiimana ne Eliyà, ngàmba mukenji mukezùke ne wà kazeze awu, pa Dìyi dyà Nzambì. Àlèluuyàh! Ngàkashààla nendè pa Mukunà wà Kaamèèlè pààkiimanàye nkàayèndè kuntwaku apu. Ngàkamumòna ùsambila ùpwekesha kapyà kafùmìne mu dyulu.

Mvwa ne Davìdì pàakashebeyàye Goliyàtá apu. Butùmbi kùdi Nzambì's wè!

170 Èè, piikalàbi ne ndi mwena Killistò, s'ndi mufwànyikijùbwe mu byònsò abi. Bikèngela ngiikalè citùpà cyà ku byòbì abi. Èyowà's, mukalenge.

Ngàkamba cipròfetá pàmwè ne Yeshààyi mu ditùkù dyèndè.

171 Mvwa ne Yone mu Yadènè pàakamònàye nyuunyi wa nkuci ùpweka pambidi Pèndè apu. Mvwa mwimàne ne Yone ku Yadène aku.

172 NgàkaMumòna wòndopa babèèdi; ùbiisha Lazàrò ku lufù; ùbiisha mwànà wa bakàji wa Yayilò awu wàlukila cyàkàbìdi ku

mwoyi, paanyimà pàà yéyè mumanè kufwà. Ngâkamòna cyôci aci.

¹⁷³ Ndi mufwànyikijìbwe Nendè mu lufù Lwendè. Ngâkafwà Nèndè pàakafwàYe ku Kàlvariyo apu, ne ngâkabiika Nendè ku lufù mu dindà dyà Paasàkà adi, mu bukolè bwà dibìikà Dyèndè dyà ku lufù. Mémè ndi ntèmù waci dilòlò edi. Ngâkafwà Nendè ku Kàlvariyo, kubiika Nendè dyà Paasàkà adi. Àlèluuyàh! Bwà kwikala citùpà cyà ku Yéyè, bikèngela mfwanyikijìbwe Nendè. Ngâkafwànyikijìbwa Nendè mu lufù Lwendè. Ngâkafwànyikijìbwa Nendè mu kukèngà Kwèndè. Ngâkafwànyikijìbwa Nendè pàakaMubèngàbo kùdì màngumba apu. Ngâkafwànyikijìbwa Nendè pàakaMupàtulàbo mu ntempèlù, pàakateetàbo bwà kuMwela pambèlu, kutàpuluka Nendè apu. Mvwa Nendè mwaba awu. Mvwa Nendè mu lufù Lwendè, kubiika Nendè ku lufù mu dibìikà dyà ku lufù.

¹⁷⁴ Ne mvwa ne bantu lukàmà ne makùmi àbìdì abu pàakabàndàbo mu cibambalu cyà kuulu apu. Èyowà's, mukalenge. Ngâkadìmwèna cipeepèlè cyà cìvuma aci cìfùmina mu Dyulu. Ngâkaakula mu myakulu pàmwè ne bàakalaabiibwà mu Ditùkù dyà Mpenta abu adi. Àlèluuyàh! Mvwa kù bwalu ndi mufwànyikijìbwe Nendè. Butùmbi kùdì Nzambi's wè! Ncyà bushùwà. Ngâkayiisha ne Peetèlò, mu Byenzedi 2. Kaa, ngâkayiisha nendè kuntwaku.

¹⁷⁵ Ngâkayiisha ne Pòlò pa Kakùnà kàà Mars, kumpalà kwà badyudi. Èyowà's, mukalenge. Bìvwa bikèngela ngiikalèku.

¹⁷⁶ Mvwa ne Yone mu Cisanga cyà Paatèmò. Ngâkamòna cìkèènà-kumònà cyà Dilwa Dyèndè. Ki cìndi mmòna eci. Ngâ—ngâkamòna Luther. Mvwa nendè pàvwaye mu dilongolola apu.

Mvwa ne Wesley.

¹⁷⁷ Kàdi mpindyewu ndi muneemu mu Yuma, mu Arizona. Àlèluuyàh! Ndi mufwànyikijìbwe dilòlò edi, mu Cilààla-beenyi cyà Stardust eci, ne kasumbù kàà bantu bàdi bìitabuujà cintu cimwècimwè eci. “Nèku mpindyewu tudi basòmbe pàmwè mu myaba yà mu Dyulu mu Kilistò Yesù.” Àlèluuyàh! Ndi mwindile Dilwa Dyèndè mu butùmbi, dimwè dyà ku matùkù àdì panshì aa. Mufwànyikijìbwe Nendè!

Mu kwikala ne mwoyi, Yéyè wàkannanga; mu kufwà, Yéyè wàkansungila;
Mujiikiibwe, Yéyè wàkangata mpèkaatù yànyì è kuya kayishiya kule;
Mu kubiika kwà ku lufù, Yéyè wàkambingisha cyanàànà bwà kashidi:
Dìngà ditùkù Neàlwè—kaa, ditùkù dyà butùmbi's wè!

¹⁷⁸ Ndi mpindyewu mufwànyikijìbwe mu dibàtiiza dyà Nyumà Mwimpè; kacyi cintu kampànda pambèlu apa mu mùsèèsù emu, cyà kùkaadi bidimu makùmi ànaayi to. Ndi naaci mpindyewu

mene, butùmbi ne bukolè bwà Nzambi, bwà difwidiibwa dyà luse ku mpèkaatù. Ndi mMumòna wòndopa babèedi, utàbeeja mèsù à mpofo, mMumòna ùdyànjila kwamba maalu, ùbala mu myoyi yà bantu. Ndi mufwànyikijìibwe Nendè mu mudimu Wèndè wa bwambi mu ditùkù edi. Butùmbi kùdì Nzambi's wè! Ndi mufwànyikijìibwe Nendè, bwà disùngidiibwa mu ditùkù dyà ndekeelu edi. Ndi mutwishìibwe ne ndi citùpà cyà ku Mukàji-musèla munène udi ulwa òmwè dyà ku matùkù àdi panshi aa.

¹⁷⁹ Bàà pa buloba nànsha bambè cinyi, bàdi mwà kutùbìikila mutùdì “bapàle, bajimije lungènyi, anyi ba-Beelèzèbùlà, anyi bapàmbùke,” cyònsò cìdìbo baswè kwikala aci. Ndi ànu muswè kwikala mufwànyikijìibwe ne kasùmbù aku. Ncìcìdi ànumù. Ndi nshààla ànumù. Mwòmò amu ki mùndi mulediibwe. Ndi muswè kushàalamù. Nèngìikalè misangu yònsò ànumù, bwalu Nzambi mmuntèekemù. Ki mùndi. Ngàkashiya èkèleeziyà wanyi, bwà kulwa kudifwànyikija ne musùmbà wà bansantu babùnguluki bàà mu malaba. Mémè ndi umwe wabò. Ndi mufwànyikijìibwe naabò.

Bòbò bàdi bàmba ne: “Billy, udi mujimije lungènyi.”

¹⁸⁰ Pàmwàpa mvwa mulùjimije's, kàdi ngàkapeta meeji à Kilistò. Ndi mupetè Díyì Dyèndè, mupetè Bwikadi Bwèndè, musangàne ne Yèyè ùdi umwèumwè awu makèèlèlè, leelù, too ne kashidi! . . . cìdì muntu mukwàbò kanà yònsò wèla meeji pa bwalu abu nànsha ciikàle cinyi. Ewu mmémè. Mémè ngudi ne cyà kwenza difwànyikijìibwa dyànyì. Ndi mufwànyikijìibwe Nendè, ku Díyì dyà Nzambi. Mmwambè ne: “Bimanyinu ebi nebìfilè aba bàdi bìtabuujà.” Ndi ne disànka mùndi mufwànyikijìibwe mu cyòci aci. Èyowà's, mukalenge.

¹⁸¹ Nudi bamanyè's, mwimbi wa kale mupilùke wà cìndaalà awu, musangu kampànda, nukàadi bumvwè bwalu abu, bàvwa ne cìndaalà cyà kale cyèdiibwa mvwàndù, bàvwa baswè kucisùmbisha, kàdi muntu kàyikù muswè kucisùmba to. Bòbò kwamba ne: “Nganyì udi muswè kufila ndola umwe? Nganyì udi muswè kufila ndola umwe ne citùpà?” Ndekeelu wa byònsò ne: “Kwamba musangu umwe, misangu yìbìdì, ndola umwe ne citùpà.”

¹⁸² Ndekeelu wa byònsò muntu mukùlàkàjì kampànda wa mvya ku mutù kupàtukayè mu batèeleji amu. Nudi bamanyè bwalu abu. Kucyàmbùlayè, wàmba ne: “Ngànjìbi kucitwa byanza.” Kulaabayè màmùtá ku mucì wàcì awu, kàdi kwanjìyè kucituuta katancì kakesè. Bantu kàdi asàayi myadi's. Binsònji kubangabi kubàpwekela ku matàma, mùshindù ewu.

¹⁸³ Ne pààkenzàbo nàнку, ki mweleshi wa mvwàndù awu kubangululayè cyàkàbìdì, kwambayè ne: “Nganyì udi mwà kwela mushinga,” wàmba ne, “wà ndola cinunu, binunu bibìdì, binunu bitaanu?”

184 Dishìilangana òwva òyà cinyi? Mwimbi mupilùke, uvwa mucimanyè awu, uvwa mucisongè awu, nguvwa mumanyè mwà kupàtulamù cintu cìvwà cìsanganyibwamù.

185 Nènku patùcìdì ànu tuteeta bwà kupàtwila èkèleeziyà yètù ku twitabàayi ne màngumba, katwàkwangulakù mpasu nànsha. Lekèlaayi Mwibaki Mupilùke wa bukwàbantu, Wàkenza muntu mu cimfwànyì Cyèndè sungasunga awu, Udi munkaci mwà kuMwibakila Mukàji-musèla bwà cintu cimwècimwè aci awu, nshinga Wendè wa disèngeleela wa Nyumà Mwìmpè awu àdìdinge ànu àtuutè Dìyì edi munda mwà mwoyi wèbè musangu wùmwè, ne cyòci aci's neciikalè cileejilu cyètù cyà citàmbe bwìmpè. Nànsha wèwè uya mu èkèleeziyà yà minène búngì kaayi, ne nànsha mēna búngì munyi mafùnda mu mukàndà wà mēna, necyènzèlè Yesù Kilistò byàbúngì kutàmba èkèleeziyà yònsò ayi, ne màngumba, ne twitabàayi ayi, ne èkèleeziyà yà pa buloba, ne malongolodi, pa buloba bujimà.

186 Ùdi munkaci mwà kwenza Mukàji-musèla. Èyowà's, mukalenge. Ùdi wènda ùlamuna tupesa atu mpindyewu, wènda ùtuula maalu à pa buloba. Kaa, diya kashàala wa mu èkèleeziyà, ne twitabàayi, ne màngumba, ne mèyi maswika, byònsò bidi ne cyà kusònjiibwa ku Èkèleeziyà; mmmwènu yàbò yà bintu byà kwìsùkwìsù ayi, dibènga kucyùkà dyàbò dyà maalu adi, malongesha àbò awu ne bikwàbò. Alùkilaayi nùlekelè Mulongeshi mupiluk'awu àmbulè mucì wà cindaalà awu. Mulongeshi awu àkubàkulè mu byanza Byèndè, àtuutè Dìyì, àmbè ne: "Yesù Kilistò ùdi umwèumwè awu makèlèlè, leelù, too ne kashidi."

187 Ambà ne: "Amen, Mukalenge. Ngenzèku, mfwimbèku, ngenzèku, Mukalenge, cìvwà cikèngelà bwà mēmè kwikala aci." Dìbà adi nekwikalè cintu cishìilàngàne.

188 Dìbà adi: "Mēmè mubàndishiibwe muumùke pa buloba, Nènkòkè bantu bònsò kùNdì." Èyowà's, mukalenge.

189 Ùdi munkaci mwà dikusonga mpindyewu, ùkupempa ùkushìya Dìyì Dyèndè nkààyaadi, ùkòsa twitabàayi yònsò ne mèyi maswika ne bikwàbò byònsò, ùbyumusha kùdì, ùteeta bwà kwaluka ku Mukàji-musèla bwà Mwànà, mukwàbò mudimu mwowela byanza, citùpà cyà ku Dìyì. Dìyì's.

190 Yesù kàvwa mwà kwangata kaaba aku to. Nudi bavùlùke pàakabalàbo ditùkù adi mu mukàndà awu anyi? Wàkabala ànu katùpà kàà cipròfetà aci, kushìya cìvwà cishàale aci bwà matùkù à ndekeelu. Twètù mbàdì ne cyà kwangata citùpà aci.

191 Pa nànkù, nudi numòna's, Yèyè mmukòse, muswè kukòsa kupàtula Èkèleeziyà, ànu mwàkapàtulàYe Mwànà amu, ànu mwàkenzàYe Mukàji-musèla ne Mubàki amu. Bwà kwikala Mukàj'Èndè-musèla, wèwè udi ne cyà kwikala citùpà cyà ku Yèyè. Kì ncitùpà cyà twitabàayi to, kì ncitùpà cyà ku èkèleeziyà to, kì ncitùpà cyà ku dingumba to, kàdì ncitùpà cyà ku Yèyè. Yèyè

musongela pa cintu cyà kwisùkwisù cyà mùshindù mukwàbò kanà wònsò, kabyàkukumbànakù to. Bikèngela ùsongiibwè pa Dîyi. Maalu a pa buloba makòsa muumusha kûdi, ne kushiya ànu Dîyi nkààyaadi ne mwoyi munda mwèbè.

¹⁹² Musongi munène awu mmukutèkèmène wêwè, bwa wànyishè bwà kwimana ne kudîfwimbisha mu difwànangana dyà dilòmbà Dyèndè didì Dîyi Dyèndè dilòmba. “Mu matùkù à ndekeelu Nèngiìcikijè Nyumà Wanyi pa mubidi wònsò. Bânà bèènù balela bàà balùme ne bàà bakàji nebàmbè bipròfetà.” Kilistò ki Mudimu mwowela byanza mumanyishìibwe wa Dîyi divwijìibwe mubidi. Wêwè udi mulòmbiibwe bwà kufwànyikijiibwa mu Yèyè, ku Dîyi dimwèdimwè adi, bwà kwikala mudimu mwowela byanza bwà Mukàji-musèla.

¹⁹³ Mpindyewu, bânà bèètù, Nzambi ùvwa ne mudimu mwowela byanza cikondo aci, wà kuleeja kùdi bà pa buloba, mpindyewu Udi ùkèba mudimu mwowela byanza leelù ewu. Udikù muswè anyi? Udi mudìlongòlòle anyi, mulundà wanyi mwena Kilistò? Udi mutwishìibwe cyà bushùwà ne nsòmbelu wèbè ùdi menemene ùleejiibwa bwà Kilistò, nànsha bàà pa buloba bambè cinyi anyi. Bàdi bàmba ne: “Wajimiji lungènyi. Wabùluku. Udi mukashààle wa mu musumbà wa bansantu babùngùluki bàà mu malaba awu.” Kwikadiku utèya ntèmà aku to.

¹⁹⁴ Wêwè kùyi bulelèlè musungìdiibwe, ne mu Mubidi awu, ne Dîyi dyà Nzambi munda mwèbè ne diDileeja Dyòdi diinè, ne Mwoyi wà Kilistò ùdileejila munda mwèbè; mwanèètù wa balùme, mwanèètù wa bakàji, kwikadikù unàya ne mudilu nànkù awu to. Cyùdi nànsha ciikàle cinganyi, nànsha wèwè mwenzè malabula à mùshindù kaayi awùdi naawu, lekèlè Dîyi adi didilèèjile mu wêwè ditùkù dyònsò, bwalu Nzambi, mu matùkù à ndekeelu aa, ùdi wàngata Mukàji-musèla bwà Mwànà’Endè, Yesù Kilistò.

Twìnyikàayi mitù yètù.

¹⁹⁵ Taatù wa mu Dyulu munanga, mùshindù muumàkàne nùnkù ewu kumpàla kwà musumbà wà bantu bàà meejì. Dilonga dyànyi dyà kàlaasà ndikumb- . . .kì ndikumbàne to, Mukalenge. Ndi ndòmba bwà Nyumà Mwìmpè munène awu abwejèku mèyi aa mu myoyi yà bantu, bwà bààfikakù ku dimòna cìmvwà muswè kwamba aci, bu bòbò kabàyi mwà kuumvwakù mu wanyi mùshindù wà disùsulula bintu to, Mukalenge. Kàdi, munda mwà mwoyi wanyi, ndi—ndi mmòna cyÛdì—cyÛdì uteeta bwà kwenza.

¹⁹⁶ Ndi ngiitabuujà, Taatù, ne Mukàji-musèla ùdi ne cyà kwikala citùpà cyà ku Mubàki. Ûdi ne cyà kwikala ànu wa mwomùmwe ne Mubàki, bwalu ùdi citùpà cyà ku Yèyè. Kènàku nànsha bishi, nànsha bishi mwà kwikala Mukàj’Endè-musèla to pàdiye kàyi mulwè citùpà cyà ku Yèyè. Nènku ncutùpà cyà

ku Dîyi, leelù ewu, didi dyàmba ne Yèyè ùdi umwèumwè awu makèlèlè, leelù, too ne kashidi aci.

¹⁹⁷ Lutete lwà blé lùvwàku ne mwoyi musangu kampànda wàwa pa buloba alu, ne lumatè mu buloba, lwàkajuuka mu difwànangana ne lutete lùvwa luyè mu buloba alu. Nènku, Mukalenge, mu Ditùkù dyà Mpenta kwàkapàtuka Èkèleeziyà munène. Kwàkalwa lutete lukwàbò lwà blé, bwà kuvwijiiwalù Mubàki ne Mukàji-musèla bwà ditùkù dyà ndekeelu.

¹⁹⁸ Twètù kusangana ne, lwàkadishinda, bwèndè Yèyè, munda mwà bidimu cinunu. Kuumukila ku nsangilu wa ku Nicée, luvwa lushàale lwènda lùbola mu buloba.

¹⁹⁹ Badyudi kufùndabò mukàndà ne, *Nzambì Mupùwe*, “Uvwa mufwànyine kulekela bânà bakesè bàfwa, ne bàshebeyiibwa kùdi nyama yà ntambwe, ne bòoshiibwa awu. Ne bashipyanganyi bàà mu dicyònkomojangana bàvwa bàshipà beena Kilistò bwà diitabuuja, ne babòoshela pa makunji à dyoshelanganakù.” Bu muntu awu nànsha mwà kwikala ne dyumvwa dyà nyumà’s!

²⁰⁰ Bikèngela bwà blé awu àbolè mu buloba amu, kàdi ùvwa ùtòloka cyàkàbidì, kàyi mu difwànangana dyà mùvwàye muyè mu buloba amu to. Ùvwa ùya mu buloba mu difwànangana ne lutete lwà blé, kàdi, pàakapàtukàye, ùvwa ne ndambù wa tubèji, bu mùdi blé mutekète udi utòloka awu.

²⁰¹ Ndekeelu wa byònsò kukolayè, kuumukila ku Luther too ne ku Zwingli, ànu nànkù, ne ndekeelu wa byònsò kufikayè ku mwepu. Wàkadishintulula mu matùkù à Wesley. Cìtamba kufwànanganaku kakesè ne blé, ne kufwànangana nendè kutàmba mùvwà tubeji amu. Ùdi wènda wàlukila cyàkàbidì ku yèyè mwinè.

²⁰² Pashiishe tudi tusangana ne, lùdi lùbànda, lutete, lwàmba kufwànangana ànu ne lwà lulelèlè alu. Nènku wèwè ànu muswè kuya ne kuuvula cizubu aci, neùjandulè. Lutete lwà kumpàla lwà blé alu kalwèna ne lutete munda mwàlù amu to, nànsha kakesè. Ncizubu, dibèji. Mukalenge, ditàbuluja dinène dyà beena Mpenta dyàkapàtuka adi, bivwa bìkèngela kwikalabi mùshindù awu, Mukalenge, bwà kukùba Blé awu pààlwàye bulelèlè. Kakùvwakù kufwànyine kwikala mwaba wà Yèyè kuya to.

²⁰³ Mpindyewu, Taatù, tudi bamanyè ne tudi twangacila bintu byònsò ku bufùki, bwalu Wèwè ngutu mwenzè bufùki. Wèwè wàkapikula buloba: ku mùshindù Úwàkabùbàtiiza, mu matùkù à Noà, paanyimà pàà kuyiisha kwèndè; Wèwè kumacisha Mashi a Mwànà pa buloba, bwà kubùjidila bwèbè Wèwè mwinè; ne mu cikondo cinène cìcilwalwà, mu divwijulula dyà bintu bipyabipyà, Wèwè neùbwòshè bwònsò ne kapyà, bwà kwosha kubùtula bintu byònsò byà pa buloba. Ànu mÙdi wenza ne mwena Kilistò amu, Udi umusùngila: umubàtiiza; umujidila; pashiishe umuumusha maalu à pa buloba mu kumuvwija

mupyamùpyà, ne ùmunana díbà adi bu webè Wêwè, mu kutèèkà kwà Nyumà Mwímpè munda mwèndè.

²⁰⁴ Tudi bamanyè ne blé ewu mmupicile ku nshintùlùkilù umwèumwè awu. Bufùki bwònsò bùdi bùkwàta mudimu mùshindù wùm wèwè wùm wè awu. Mpindyewu, Mukalenge, patùdi tumòna cizubu mpindyewu munkaci mwà kulamunuka ne Lutete alu, ciya mùyaaya bàà pa buloba, Éyi Nzambi, enzàku bwà ntete ayi yàmònakù... Bikèngela bwà ci—cizubu aci cìlamunukè, bwà lutete lùmonè mwà kubwela mu Bwikadi bwà Mwànà. Ndi ngumvwa dilwa dyà katumba kàà dinowa naakù aku, Mukalenge. Kakwàkunèngakù to. Ne pashiishe cibàndishi cinène aci ncyàmbulè Mukaj'Èndè-musèla mu butumbi, mu Bwikadi bwà Nzambi.

²⁰⁵ Ndi ndòmba, Taatù, bwà Wêwè kubèneshakù yònsò wa kutùdi. Tùvulukèku, Mukalenge, ne ewu ki wetù mpùngà. Tudi mwà kwikala katùyi nendè mààlabà to. Leelù ki wetù mpùngà. “Leelù ewu, paanyimà pàà cipòlò cile nùnkù, panùdi nuumvwa Dìyi Dyèndè, kanùpapishi myoyi yènù to.” Mukalenge Nzambi, mèmè ncyèna mumanyè bantu aba to. Kwòkù muntu kampànda mwaba ewu, mupangile cyòci eci, enzàku dilòlò edi bwà àpeta kaabujimà kàà Nzambi, ne ùjiibwè tènte ne Nyumà Mwímpè. Enzàku nànkù, Taatù.

²⁰⁶ Mpindyewu ne mitù yètù miinyika, myoyi yètù miinyika, kàbidì. Balundà bàanyi, mfwilaayikù luse bwà wànyì mùshindù wùndì nkòsolola mukenji wànyì. Ndi—ndi ndòmba bwà Nzambi ànuleejèku ànu cìmvwà mèmè muswè kwamba aci. Mpindyewu, piikalabi ne... Ncyèna muswè bwà muntu ikalè mutàngile to. Lamà ànu mutù wèbè awu mwinyika. Ncyèna mumanyè to. Nànsha wèwè mwikàle nganyì, pawikalà kùyì mutwìshìibwe ne mwoyi wèbè... .

²⁰⁷ Mpindyewu, nwamònu's, yònsò wa ku nshintùlùkilù ayi, cyàkenzàbò ncinyì? Bààkabwela mu bulongolodi kampànda. CyàkenzàYe ncinyì? Nyumà ùvwa ùmuka, ùya kùdi mukwàbò. Luther mmwenzè ànu udivwija bulongolodi; kukabwelaYè buludi mu Wesley. Wesley kudìvwijayè bulongolodi; kukabwelaYè buludi mu Mpenta. Mpenta wàdivwiji bulongolodi; kùyaayaYe mpenyi? Ànu mùvwà Dikunji dyà Kapyà amu, ùtùngunuka ànu ne kwenda kuya.

²⁰⁸ Kàdi bàmwè bantu, bàdi bàmba ne: “Mèmè ndi mwena Mpenta.” Abi's bidi ànu bìmpè. “Mèmè ndi Luthérien.” Abi bidi ànu bìmpè. Kakwèna cilumbù nàsha cìmwè pa bwalu abu to.

²⁰⁹ Kàdi, mulunda wanyì, mulundà wanyì, Blé's ùcidi ànu ùtùngunuka ne kwenda kuya. Tudi bapetè òmwè dyà ku matàbuluja à matàmbe bunène. Dìkaadi—dìkaadi dinènge ditàmbidila. Maalu-malonda àdi àleeja ne ditàbuluja ditu dinènga bidimu bitwè ànu ku bisàtu cyanàànà. Edi dyènji bidimu dikùmi ne bitaanu, anyì bipite apu, tùmpanyè tunènè twà

dyondopa, kàdi patùdi twakulangana apa dyàkwàci mashika. Tàngilàayi! Ditàbuluja dyònsò ditu misangu yònsò ànu dipàtula bulongolodi paanyimà pàadi. Bwà cinyi edi dyòdi kî ndipàtule bulongolodi? Kùdi kasumbu kakesè kàà bânà bèètù kàdi kabangè, muneemu mu mwaba kampànda, kabìikidiibwa ne Mvùla Mushìishe, kabèèna ne kùdibo bayè to; s'bimànyì. Bwà cinyi? Ncikondo cyà Blé, balundà bàanyì. M'Blé. Kùdi mudimu wà bwambi pa buloba mufwànàngàne ànu menemene ne wàkayà mu buloba kale wàwa ku cibangidilu awu, dilabula dilelèlè dyà mpenta.

²¹⁰ Èkèleeziyà yikaadi yènda yidìvwija malongolodi. Ne umwe ùdi ùteeta bwà kwibaka citanda cinène kutàmba cyà mukwàbò, ne kupeta bidimba bitàmbe búngì ne bikwàbò, malongolodi, ku kakesè ku kakesè. Tudi tucimòna. Mémè's ndi mwena mpenta. Tudi tucimòna ciditapulula. Kàdi ncinyi? Bikèngela cyènzè nànkù, bwà—bwà bukènkè bwa Mwànà bwàmòna mwà kufika ku Lutete. Bu ne kacìvwamù to, dyàmbedi, bu ne kakùvwakù cizubu cilùjìngile to, kalùvwakù ne mwaba wà kuyalù to. Nzambi wàkacyènzela cizubu, nwamònu's, ànu mùdi ditalà, ànu mùdi blé, ànu mùdi cintu kanà cyònsò cidi cìpàtukà mu mpoopu amu. Mpindyewu, nwamònu's, kakwènakù bulongolodi nànsha bùmwe bubangile paanyimà pàa cyòci eci to. Bwà cinyi? Kakwèna kabìdi dìbà bwà bulongolodi to. Tukàadi ku ndekeelu.

²¹¹ Nènku wèwè kùyi ànu menemene pàvwàbi bikèngela bwà wèwè kwikala to, ne wèwè mufwànyine kwamba ne: “Mwanèètù Branham, bu Nzambi mwà kuumvwakù disambila dyèbè bwà babèèdi, bwalu nkàadikù muumvwè bìdi Mukalenge mwenzè mu dyandamuna ku disambila. . .” Nènku nukàadi bumvwè bwà bantu bakwàbò pa buloba leelù ewu ne, bàdi munkaci mwà kusambila. Udi wamba ne: “Ndi. . . Udikù mwà kunsambidila, bwà ngàpetakù dilabula adi anyi, Mwanèètù Branham? Ndi mwà kupanga kukumòna cyàkàbìdi.” Ndi mwà kupanga kukumòna. “Kàdi sambilàku bwà mémè kwikalamù. Ncyèna ànu ndyùmvwà bu ne ndi mufwànyine kwikalamu mpindyewu to. Kàdi ndi njinga bwà ùnsambidilèku, bwà ngìkalamù.”

²¹² Mpindyewu, mutù wònsò mwinyika. Elà cianza muulu, udikù mwa kuswa anyi? Mukalenge àkubènèshè, àkubènèshè, ne wèwè. Nzambi ànùbènèshè. Mu kasumbu kàà bantu aka, ngeela meeji, makùmi àtaanu, pàmwàpa, anyi byanza makùmi mwandamutekètè ne bitaanu bìvwà byela muulu.

²¹³ Mpindyewu, Yesù Munanga, Wèwè ngudi mulumbulwishi. Twètù tudi ànu bambi cyanàànà. Ndi ndòmba, Nzambi Munanga. Nènku—nènku pàngìlaku mupetè ngàsà ku mèsù Kwèbè, andàmùnaku disambila dyànyì. Wèwè wamònu cianza cyònsò cyèdìibù muulu. Wèwè ngudi mumanyè cìvwà mu mwoyi wàbò. Tudi twitabuuja ne bòbò mbalongolwela Mwoyi. Kàdi Sàtaanà, ànu mwàkadibi matùkù à Adàmà, ùdi munkaci mwà kuteeta bwà kupangisha mudimu mwowela byanza awu bwà

kupàtukawù patòòke. Swàku bwà cìmanyikijiibwè dilòòlò edi. Swàku bwà Mashi à Yesù Kilistò àcìmanyikè, ne swàku bwà bàlwe kùdì Nzambì bu mudimu mwowela byanza. Enzàku nàнку, Taatù.

²¹⁴ Swàku bwà bàfwànyikijiibwè mu Dìyì dyà Kilistò. Yéya wàkamba ne: “Muntu yéyè kàyi mulediibwe cyàkàbìdì...” Swàku bwà bàpetè dilabula dyà dilediibwa dyà cyàkàbìdì adi. Swàku bwà bàpetè dibàtiiza dyà Nyumà Mwîmpè, divwijibwa dyà bintu byònsò byà pa buloba bipyabipyà. Kì mbabiswe kàbìdì to, Mukalenge. Bàsukùlèku ku maalu à pa buloba awu, ne bàpàtùlèku bu mudimu mwowela byanza kumpalà kwà bantu. Enzàku nàнку, Mukalenge, bwà Wamònakù mwà kwikala ne disànka mu cikondo cyà lupangu lwà bikùnuyibwa mu matùkù a ndekeelu aa eci, bwà kuleeja mudimu Wèbè mwowela byanza wà balùme ne bakàjì aba, bânà bàà balùme ne bàà bakàjì, bàvwa balamè byanza byàbò muulu abu. Enzàku nàнку, Mukalenge.

²¹⁵ Bèleshàku ditàbuluja dìdì munkaci mwà kwenzeka mu cimenga emu edi. Éyì Nzambì wa yààya, ndi ndòmba bwà mulùme yònsò ne mukàjì yònsò, udi pabwipi awu, àfikèku ku ditàbuluja adi. Ne swàku bwà yònsò wa kùdìbo ùjiibwè tètè ne Nyumà Mwîmpè, ne kwènzekèku ditàbuluja dyà cyena-kale dyàtangalakà mu kaacimenga aka mwaba ewu, mu mùshindù wà bantu bàà ku myaba yònsò bàlwa. Enzàku nàнку, Mukalenge. Tùpèèshèku bintu ebi, Taatù, bwalu tudi tubilòmba mu Dìnà dyà Yesù. Amen.

²¹⁶ Ndi muMunangè. Ndi muMunangè. Nudi baMunangè anyi? Nudi bamanyè's, Pòlò wàkamba ne: “Mémè ngimba, ndi ngimba mu Nyumà.” Ndi ndikònka. Mémè ndi kule be ne kwikala kangimbà. Kàdi ndi ànu ndikonka, bònsò pàmwè, ní katwènakù bàfwànyine kubanga musambu awu, *Ndi MuMunangè*. Udikù mwà kutùpeesha cyonà anyi, mwanèètù wa bakàjì? “Bwalu Yéyè wàkannanga kumpàla.” Nukàadi bacyùmwè. Mbanganyi bàdi bawùmanyè? Tùmonàayibi byènu... Ngùmwe wà ku misambu yànyì yà kale. Ntu munangè kwimba. Eyò.

²¹⁷ Mpindyewu twìnyikàayikù ànu mitù ne tùbwitàayì kwìsù, twìmbàayì mpindyewu, *Ndi MuMunangè*.

Ndi muMunangè, ndi muMunangè
Bwalu Yéyè wàkannanga kumpàla
Ne wàkampetela lupàndu
Pa mucì wà Kàlvaryò.

²¹⁸ Tùwìmbilaayaaku mu matàma. Dìngà ditùkù myanzankòngòlò neyítangalakè mu dyulu emu. Nekwìkalè mwadi wà mpungi. Bafwè mu Kilistò nebiìkalè munkaci mwà kulwa. Kaa, mùshindù mwinè utwàCìjingà dìbà adi's wè!

Ne wàkampetela lupàndu
Ku Kàlvaryò.

225 Musongi munène wa mpingu, Nzambì munène Wakenza muntu, ne kumufwimba ne kumuvwija mu cimfwànyi Cyèbè sungasunga, Ndi nKulòmba, Mukalenge, bwà Útwàngàtèku dilòòlò edi. Swàku bwà eci ciikalè dilòòlò dyà civùlukilu, dyà divùluka menemene kutùdi, ne, dilòòlò edi, Mukalenge, dilòòlò edi, ànu mwab'ewu mene mu Cilààla-beenyi cyà Stardust emu, swàku bwà Úfwimbè bantu mu cimfwànyi cyà bàna bàà Nzambì. Enzàku nàнку, Mukalenge. Musongi munène, Wèwè ki Umwèpelè udi mwà kucyènzà. Angàtaku Dìyi Dyèbè, Mukalenge, ùDìfwimbìlè munda mene mwà myoyi yètù bònso, bwà twamònakù mwà kwikala midimu Yèbè myowela byanza mu matùkù à ndekeelu, ne kubìkidiibwa ne Mukàjì-musèla wa Kilistò. Bakwàbò bantu bàdikù mwà kumòna ne kùdi bulelèlà bwà menemene ne disànka mu diikala ne mwoyi Bwèndè Yèyè.

226 Mukalenge, mu ditùkù edi, mùdi nànsha èkéleeziyà yètù mene, biikàle munkaci mwà kujìmija meeji àbò matòoke. Kabèèna...Mbimwèke bu ne, byònsò bikaadi bishààle Hollywood, Mukalenge, cidi cyenzèke ncinyi's? Mbayè bènda bàlonda di—dibàlakana pamutù pàà dyela nsèsà. Tudi bamanyè ne buloba bùdi bùbàlakana ne bwena tusùmbù twà pa buloba. Kàdi Èvànjeeliyò ùdi wèla nsèsà ne dinanga ne Kilistò. Enzàku, Mukalenge, bwà twamònakù mwà kuumuka ku dibàlakana dyà buloba, ne kubwela mu dyela dyà nsèsà dyà Kilistò.

227 Mbèèbè Wèwè, Mukalenge. Wèwè ngwàkabàsùmba. Wèwè...Bèdi byanza muulu, dilòòlò edi, bàvwa baswè kwikala nàнку. Mpindyewu, Taatù, ndi...Bu ne mvwàkù mufwànyine kucyènzà, mvwa mwà kubàvwija cyòci aci, kàdi ncyèna mwà kucyènzà to. Kàdi ndi nkweyemena Wèwè. Wèwè wákamba ne: “Ewu udi ulwa kùNdi ncyàkumwipatakù to nànsha byà munyi. Ewu udi umvwa Dìyi Dyànyi ne witabuujà Ewu udi muNtùme, ùdi ne Mwoyi wà kashidi, ne kààkupìcilakù ku Cilumbulwidi to,” kadi kàyi ùdingidija bu udi witabuujà to, Mukalenge, kadi witabuujà, “yèyè mmuumùke ku lufù muyè ku Mwoyi.” Enzàku nàнку, Taatù. Mbèèbè Wèwè, mu Dinà dyà Yesù Kilistò. Amen.

228 Nudi baMunangè anyi? Yèyè kì mmulenga wa dikèma anyi?

229 Tupèèshèku kaacikèmù kakesè tǔng, anyi cyonà mwaba awu, mwanèètù wa bakàjì, *Mukèmeshanganyi*, *Mukèmeshanganyi*.

Nutu baswè kwimba anyi? Ndi nnwàngata mukùngùlù mupitèpìte bule anyi?

230 Mémè ntu munangè kukuukwila. Kàdi nwènù? KaaDiyiisha kakesè, kàà kàtapa mùshindù ewu, ncyèna...Nudi bamanyè's, mémè ntu mukìne kutàpa. Kàdi, udi, udi ne cyà kupoopela musonso ne kuwùbùnyina mu dibaya, bwà kukwàtawù. Nudi bamanyè cìndi muswè kwamba aci. Èyowà. Bìkèngela uwùbwejè wònsò mpindyewu. Kàdi nwamònu anyi?


²³¹ Nudi banangè musambu awu anyi? “Mukèmeshanganyi, mukèmeshanganyi, ki cidi Yesù bwànyì mêmè.” Nudi bawùmanyè anyi?

Mukèmeshanganyi, mukèmeshanganyi, ki cidi
 Yesù bwànyì mêmè,
 Mubedyanganyi, Mfùmù wa Ditalala, Nzambì
 Mukolè n'Yèyè;
 Ùnsùngila, ùndama ku mpèkaatù yònsò ne ku
 bundù,
 Mukèmeshanganyi ki Mupikudi wanyì, Dìna
 Dyèndè ditumbè!
 Kale mvwa mujìmine, mpindyewu ngààpetèki,
 musùulula ku dipiila,
 Yesù ùdi ùfila budìshikaminyi ne lupàndu mu
 kaabujimà;
 Ùnsùngila, ùndama ku mpèkaatù yònsò ne ku
 bundù,
 Mukèmeshanganyi ki Mupikudi wanyì, Dìna
 Dyèndè ditumbè!

Bantu bònsò!

Mukèmeshanganyi, mukèmeshanganyi, ki cidi
 Yesù bwànyì mêmè,
 Mubedyanganyi, Mfùmù wa Ditalala, Nzambì
 Mukolè n'Yèyè;
 Ùnsùngila, ùndama ku mpèkaatù yònsò ne ku
 bundù,
 Mukèmeshanganyi ki Mupikudi wanyì, Dìna
 Dyèndè ditumbè!

²³² Mpindyewu twămbààyi ne: “Mukalenge àtumbè!”
 “Mukalenge àtumbè!” Kanwènaayikù nudyùmvwa
 bakezùdìibwe anyi? Nudyùmvwa bilenga anyi? Kuukwilaayaaku
 Mukalenge. Yèyè's mmulenga wa dikèma.

²³³ Nzambì ànùbènèshè too ne pangààtwilanganà neenù
 cyàkàbìdì. Nèmpingajilè mpindyewu mwanèètù wa balùme
 mulombodi, bulombodi bwà disangisha. 

64-1205 Mudimu Mwowela Byanza Mumanyishiibwe Wà Nzambi
Stardust Motel
Yuma, Arizona États-Unis

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilamininyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org